

ՉՈՐՐՈՐԴ ԲԱԺԱՆՄՈՒՆՔ

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ

(գանգադ թիվ 48998/14)

ՎՃԻՌ

Հոդված 2 (Նյութաիրավական եւ դատավարական) • Դրական պարտավորությունները • Կյանքը • Պարտադիր զինվորական ծառայություն իրականացնող զորակոչիկի կյանքն արդյունավետորեն պաշտպանելու համար միջոցներ չձեռնարկելը, որն իբր ինքնասպանություն է գործել՝ դաժան նվաստացման, բուլինգի եւ ֆիզիկական վատ վերաբերմունքի ֆոնին • Չինվորական ծառայության ընթացքում վատ վերաբերմունքից պաշտպանվելու եւ ինքնասպանությունը կանխելու համար հատուկ միջոցների բացակայությունը • Ներպետական իշխանությունների կողմից մահվան հանգամանքների մասով արդյունավետ քննություն չիրականացնելը

Հոդված 13 (+ հոդված 2) • Իրավական պաշտպանության արդյունավետ միջոցի բացակայությունը • Երեխայի կյանքի կորստի հետեանքով կրած ոչ նյութական վնասի հատուցման պահանջի իրավական անհնարինությունը

Պատրաստվել է քարտուղարության կողմից: Դատարանի համար պարտադիր ուժ չունի:

ՍՏՐԱՍԲՈՒՐԳ

4 հունիսի 2024թ.

Սույն վճիռը վերջնական է դառնում Կոնվենցիայի 44-րդ հոդվածի 2-րդ կետով սահմանված դեպքերում: Այն կարող է ենթարկվել խմբագրական փոփոխությունների:

Վարյանն ընդդեմ Հայաստանի գործով,

Մարդու իրավունքների եվրոպական դատարանը (Չորրորդ բաժանմունք),
հանդես գալով Պալատի հետեւյալ կազմով՝

Գաբրիել Կուչկո-Ստադլմայեր [Gabriele Kucsko-Stadlmayer]՝ *Նախագահ,*

Թիմ Այքը [Tim Eicke],

Բրանկո Լուբարդա [Branko Lubarda],

Արմեն Հարությունյան [Armen Harutyunyan],

Անա Մարիա Գեռա Մարտինս [Ana Maria Guerra Martins],

Էն Լուիս Բորմանն [Anne Louise Bormann],

Սեբաստիան Ռադուլեթս [Sebastian Răduleţu]՝ *դատավորներ,*

եւ Անդրեա Տամիետտի [Andrea Tamietti]՝ Բաժանմունքի քարտուղար,

հաշվի առնելով՝

«Մարդու իրավունքների եւ հիմնարար ազատությունների պաշտպանության մասին» կոնվենցիայի (Կոնվենցիա) 34-րդ հոդվածի համաձայն Հայաստանի Հանրապետության եւ Ամերիկայի Միացյալ Նահանգների քաղաքացի պրն Վանո Վարյանի (դիմումատու) կողմից ընդդեմ Հայաստանի Հանրապետության՝ 2014 թվականի հունիսի 27-ին Դատարան ներկայացված գանգատը (թիվ 48998/14),

Հայաստանի Հանրապետության կառավարությանը (Կառավարություն) դիմումատուի որդու նկատմամբ վատ վերաբերմունքի, մահվան, քննության ենթադրյալ անհամապատասխանության եւ պետությունից ոչ նյութական վնասի համար փոխհատուցում ստանալու պահանջի անհնարինության վերաբերյալ նրա բողոքների մասին ծանուցելու եւ գանգատը մնացած մասով անընդունելի հայտարարելու մասին որոշումը,

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

կողմերի դիտարկումները,

2024 թվականի մայիսի 14-ին անցկացնելով դռնփակ խորհրդակցություն,

կայացրեց հետևյալ վճիռը, որն ընդունվեց նույն օրը.

ՆԵՐԱԾՈՒԹՅՈՒՆ

1. Գործը վերաբերում է դիմումատուի որդու՝ զինվորական ծառայության ընթացքում ենթադրաբար ինքնասպանության հետեւանքով մահվանը եւ հետագա քննությանը: Գործում բարձրացված են հարցեր հիմնականում Կոնվենցիայի 2-րդ եւ 13-րդ հոդվածների շրջանակներում:

ՓԱՍՏԵՐԸ

2. Դիմումատուն ծնվել է 1966 թվականին եւ ապրում է Աբովյանում: Նա իրավական օգնություն է ստացել, եւ նրան ներկայացրել է Վանաձորում գործող իրավաբան տկն Ա. Չատինյանը եւ Հելսինկյան քաղաքացիական ասամբլեայի Վանաձորի գրասենյակի նախագահ պրն Ա. Սաքունցը:

3. Կառավարությունը ներկայացրել է Կառավարության լիազոր ներկայացուցիչ պրն Գ. Կոստանյանը, իսկ այնուհետեւ՝ Միջազգային իրավական հարցերով Հայաստանի Հանրապետության ներկայացուցիչ պրն Ե. Կիրակոսյանը:

4. Գործով փաստերը կարելի է ամփոփել հետևյալ կերպ:

I. ԳՈՐԾԻ ՆԱԽԱՊԱՏՄՈՒԹՅՈՒՆԸ

5. 2011 թվականին դիմումատուի որդին՝ 18-ամյա Տ. Վարյանը, զորակոչվել է Հայաստանի Հանրապետության բանակ:

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

6. Դիմումատուն պնդել է, որ իր որդին պիտանի է ճանաչվել միայն ոչ մարտական ծառայության համար՝ հաշվի առնելով նրա առողջական վիճակը: Կառավարությունը վիճարկել է դա՝ նշելով, որ Տ. Վարյանը ճանաչվել է մարտական ծառայությանը պիտանի: Այդ կապակցությամբ նրանք ներկայացրել են զինվորական կոմիսարիատից ստացված՝ Տ.Վարյանի անձնական գործի պատճենը, որից երեւում է, որ զորակոչի ընթացքում իրականացված բուժզննումների արդյունքում նրա մոտ ախտորոշվել է միտրալ փականի պրոլապս՝ առաջացնելով միտրալ փականի անբավարարություն (սրտի վիճակ, երբ որոշակի քանակությամբ արյուն հոսում է սխալ ճանապարհով, քանի որ սրտի ձախ կողմում գտնվող երկու խորշերի միջև գտնվող փականի փեղկերը հարթ կամ հավասար չեն փակվում սրտի կծկման ժամանակ): Տվյալ անձնական գործում առկա է Կենտրոնական բժշկական հանձնաժողովի՝ նրան մարտական ծառայության համար պիտանի ճանաչելու մասին որոշումը:

7. Դրանից հետո Տ. Վարյանը ծառայության է նշանակվել Լեռնային Ղարաբաղի զինված ուժերի թիվ 38862 զորամասում (Լեռնային Ղարաբաղի Հանրապետությունում (ԼՂՀ) գտնվող զորամաս):

8. 2012 թվականի փետրվարի 29-ին Տ.Վարյանին գտել են մահացած՝ ստորին ծնոտին հասցված հրազենային վնասվածքով, որը հասցվել է իրեն կցված ինքնաձիգով:

II. ԴԻՄՈՒՄԱՏՈՒԻ ՈՐԴՈՒ ՄԱՀՎԱՆ ԳՈՐԾՈՎ ՔՆՆՈՒԹՅՈՒՆԸ

9. 2012 թվականի փետրվարի 29-ին Հայաստանի Հանրապետության պաշտպանության նախարարության քննչական ծառայության երրորդ կայազրի քննչական բաժինը (Մարտակերտ, Լեռնային Ղարաբաղ) որոշել է քրեական վարույթ հարուցել Տ. Վարյանի մահվան գործով: Որոշման մեջ, որքանով վերաբերելի է սույն գործին, նշված էր հետեւյալը.

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

«2012 թվականի փետրվարի 29-ին՝ ժամը 22:00-ի սահմաններում, [Տ. Վարյանը], ... հենակետում հերթապահության ժամանակ ..., իրեն կցված ... ինքնաձիգով կրակել է իր ստորին ծնոտին եւ ստացված հրազենային վնասվածքի հետեանքով տեղում մահացել է ...»:

10. Նույն ամսաթվին քննիչն իրականացրել է դեպքի վայրի զննություն եւ տեղում այն լուսանկարել դիակի հետ միասին: Համապատասխան զեկուցագրի համաձայն՝ Տ. Վարյանի դին հայտնաբերվել է զորամասի հրամանատարական դիտակետում՝ հատակին: Ինքնաձիգն ուղղված է եղել նրա բերանին՝ բերանի եւ փողաբերանի միջեւ մոտ 2 սմ հեռավորությամբ, իսկ կոթը հենած է եղել հատակին: Բերանից եւ ականջի խոռոչից դեռեւս արյունահոսություն է եղել, ատամները (հատկապես առջեւի) կոտրված են եղել, քթի խոռոչում մակարդված արյուն է եղել, քթի կամրջի վրա ուղղահայաց վնասվածք է եղել, կզակի տակ եւ գլխի թագի ճակատային մասում վերքեր են եղել: Ինքնաձիգի կողքին հայտնաբերվել է մետաղյա պարկուճ: Քննիչն առգրավել է ինքնաձիգը եւ պարկուճը՝ անվտանգության նկատառումներից ելնելով ինքնաձիգի վրա ամրացնելով ապահովիչը:

11. Նույն ամսաթվին քննիչը դիտարկում է նշանակել: Համապատասխան որոշման մեջ նշված էր, որ Տ. Վարյանն ինքնասպանություն է գործել, եւ որ, *inter alia* (ի թիվս այլնի), անհրաժեշտ էր պարզել նրա մարմնի վրա վնասվածքների առկայությունը, վնասվածքների հրազենային հատկանիշներն ու դրանց թիվը, եւ այն, թե արդյոք նա կարող էր դա (կամ դրանք) պատճառել ինքն իրեն:

Ա. Վկաների հարցաքննությունը

12. Նույն օրը քննիչը հարցաքննել է կրտսեր սերժանտ Է.Ս.-ին եւ շարքային Ռ.Ա.-ին (երկուսն էլ զորակոչիկներ), որոնք ավագ լեյտենանտ Հ.Հ.-ի հրամանով Տ. Վարյանի հետ հենակետում հերթապահության են եղել:

13. Իր ցուցմունքում կրտսեր սերժանտ Է.Ս.-ն հաստատել է, ի թիվս այլնի, որ 2011 թվականի դեկտեմբերի վերջին, երբ ինքը, շարքային Ռ.Ա.-ն եւ

Տ. Վարյանը միասին հերթապահել են, Տ. Վարյանը կեղտոտել է զուգարանը, ինչի հետեանքով այն օգտագործելն անհնար է դարձել: Այնուհետև ավագ լեյտենանտ Հ.Հ.-ն հայիոյել է Տ.Վարյանին եւ հարվածել նրա կրծքավանդակին, ինչի հետեանքով վերջինս ընկել է մահճակալին: Ավագ լեյտենանտ Հ.Հ.-ն նաեւ ստիպել է Տ. Վարյանին ստորագրել գրավոր պարտավորություն, որ մեկ շաբաթվա ընթացքում զուգարանի համար նոր փոս էր փորելու: Ավագ լեյտենանտ Հ.Հ.-ն պահել է այդ թուղթը եւ սպառնացել, որ ցույց կտա այն զորամասի հրամանատարին, եթե Տ.Վարյանը չկատարի պարտավորությունը: 2012 թվականի փետրվարի 28-ի երեկոյան ավագ լեյտենանտ Հ.Հ.-ն կրկին հայիոյել է Տ. Վարյանին եւ հարվածել նրան: Այնուհետև ավագ լեյտենանտ Հ.Հ.-ն Տ. Վարյանից պահանջել է հաջորդ օրը շարունակել փորել նոր զուգարանի փոսը: Կրտսեր սերժանտ Է.Ս.-ն եւ շարքային Ռ.Ա.-ն այնուհետև մեկ ժամով թողել են Տ.Վարյանին եւ ավագ լեյտենանտ Հ.Հ.-ին՝ փայտ կտրելու համար: 2012 թվականի փետրվարի 29-ի առավոտյան ժամը 9:10-ի սահմաններում ավագ լեյտենանտ Հ.Հ.-ն բարձրացել է հենակետ՝ Տ. Վարյանին տեսնելու, եւ վերադարձել մոտ հինգ րոպե անց: Այնուհետև առավոտյան ժամը 9:50-ի սահմաններում Է.Ս.-ն գնացել է հենակետ եւ հայտնաբերել դիակը: Այդ պահին ավագ լեյտենանտ Հ.Հ.-ն սպառնացել է նրան եւ շարքային Ռ.Ա.-ին եւ ասել, որ ոչ ոքի չպատմեն նախորդ գիշերվա կատարվածի մասին:

14. Շարքային Ռ.Ա.-ն հայտնել է, որ Տ.Վարյանը խնդիրներ է ունեցել կրտսեր սերժանտ Է.Ս.-ի եւ ավագ լեյտենանտ Հ.Հ.-ի հետ: Նա նույնպես ցուցմունք է տվել, որ 2012 թվականի փետրվարի 28-ի երեկոյան վիճաբանություն է տեղի ունեցել, որի ժամանակ կրտսեր սերժանտ Է.Ս.-ն մեկ անգամ հարվածել է Տ. Վարյանին, իսկ ավագ լեյտենանտ Հ.Հ.-ն, որը ծանր վիրավորանք է հասցրել Տ. Վարյանին, նույնպես փորձել է հարվածել նրան, սակայն շարքային Ռ.Ա.-ն նրան թույլ չի տվել դա անել: Ժամը 21-ի սահմաններում շարքային Ռ.Ա.-ն վերադարձել է կացարան եւ տեսել, որ Տ. Վարյանը շատ դժբախտ տեսք ունի: Հարցին, թե ինչու, Տ. Վարյանը միայն ասել է, որ ոչինչ չի եղել: Շարքային Ռ.Ա.-ն

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

այնուհետև փորձել է ավագ լեյտենանտ Հ.Հ.-ից իմանալ, թե ինչ է տեղի ունեցել, որն ասել է, որ ոչինչ չի եղել եւ ամեն ինչ կարգին է: Շարքային Ռ.Ա.-ն նաեւ հայտնել է, որ Տ.Վարյանը 2012 թվականի փետրվարի 29-ի ժամը 08:00-ից 10:00-ն հերթապահել է հենակետում: Ավագ լեյտենանտ Հ.Հ.-ն ժամը 9:10-ի սահմաններում գնացել է հենակետ եւ մոտ 10 րոպե անց վերադարձել: Շարքային Ռ.Ա.-ն այնուհետև ժամը 9:30-ի սահմաններում մեկ կրակոց է լսել, բայց կարծել է, թե դա պարզապես մեկ այլ հենակետում իրականացվող վարժանքին մասնակցող զինծառայողներն են: Ժամը 10-ին կրտսեր սերժանտ Է.Ս.-ն գնացել է հենակետ եւ հայտնաբերել դիակը: Մինչև դեպքի մասին հայտնելը շարքային Ռ.Ա.-ն, կրտսեր սերժանտ Է.Ս.-ն ու ավագ լեյտենանտ Հ.Հ.-ն ստորագրել են անվտանգության կանոնների վերաբերյալ փաստաթղթերը, որոնք մի քանի օր չէին ստորագրել: Ավագ լեյտենանտ Հ.Հ.-ն շարքային Ռ.Ա.-ին եւ կրտսեր սերժանտ Է.Ս.-ին խնդրել է ասել, որ Տ. Վարյանը կարոտել էր իր ընտանիքին: Շարքային Ռ.Ա.-ն հավելել է, որ Տ. Վարյանին շատ են ծաղրել, այն աստիճան, որ նա գերադասել է հերթապահել իրեն ծաղրող զինծառայողներից հեռու լինելու համար: Տ. Վարյանը ցերեկային ժամերին ակտիվ հերթապահություն էր անում, մաքրություն էր անում, ընդմիջում էր անում միայն գիշերը, օրեր շարունակ անընդմեջ շարունակվող իրավիճակ էր դա: Շարքային Ռ.Ա.-ն նաեւ նկարագրել է այն դրվագը, երբ Տ. Վարյանի նկատմամբ վատ վերաբերմունք է ցուցաբերվել զուգարանի պատճառով (տե՛ս վերելում՝ 13-րդ պարբերությունը), եւ 2011 թվականի նոյեմբերին տեղի ունեցած միջադեպը, երբ ավագ լեյտենանտ Հ.Հ.-ն ոտքով հարվածել էր Տ. Վարյանի գլխին ու վիրավորել նրան այն բանից հետո, երբ նրան քնած էր գտել հերթափոխի ժամանակ: Եվ վերջապես, շարքային Ռ.Ա.-ն պատմել է, որ 2012 թվականի փետրվարի 21-ին կամ 22-ին բանակի խոհարար, կրտսեր սերժանտ Գ.Մ.-ն ծեծի է ենթարկել եւ վիրավորել Տ. Վարյանին՝ խոհանոցը բավականաչափ արագ չմաքրելու համար:

15. Քննության ընթացքում հարցաքննվել են մի շարք զինծառայողներ, այդ թվում՝ սպաներ եւ զորակոչիկներ: Նրանցից ոչ մեկը չի հայտնել, որ Տ. Վարյանը

երբեւէ փորձել է ինքն իրեն վնասել կամ այդպիսի բան անելու մասին որեւէ միտք է հայտնել:

16. 2012 թվականի մարտի 1-ին քննիչը կրկին հարցաքննել է կրտսեր սերժանտ Է.Ս.-ին եւ շարքային Ռ.Ա.-ին: Այդ առիթով կրտսեր սերժանտ Է.Ս.-ն լրացում է կատարել իր նախորդ ցուցմունքի մեջ (տե՛ս վերելում՝ 13-րդ պարբերությունը)՝ ասելով, որ 2012 թվականի փետրվարի 27-ին ինքը հրել է Տ. Վարյանին եւ նրա հետ վեճի է բռնվել՝ ափսեները լվանալու հետ կապված: Շարքային Ռ.Ա.-ն իր ցուցմունքում նաեւ հավելել է, որ 2012 թվականի փետրվարի 27-ին կրտսեր սերժանտ Է.Ս.-ն հարվածել է Տ. Վարյանին եւ հայիոյել սպասքի պատճառով: Նա նաեւ հավելել է, որ 2011 թվականի նոյեմբերին ավագ լեյտենանտ Հ.Հ.-ն ծեծի է ենթարկել Տ. Վարյանին այն պատճառով, որ վերջինս հրաժարվել է իր գոտին ավագ լեյտենանտ Հ.Հ.-ին տալ, որը ցանկացել է դրանից մի փոքր կտոր կտրել: Շարքային Ռ.Ա.-ն եւ կրտսեր սերժանտ Է.Ս.-ն այնտեղ են եղել, բայց այդ դեպքի մասին չեն հայտնել որեւէ վերադաս սպայի: Շարքային Ռ.Ա.-ն վիճարկել է կրտսեր սերժանտ Է.Ս.-ի ցուցմունքն այն մասին, որ 2012 թվականի փետրվարի 28-ի երեկոյան ավագ լեյտենանտ Հ.Հ.-ն հարվածել է Տ. Վարյանին (տե՛ս վերելում՝ 13-րդ պարբերությունը) եւ վերահաստատել է իր ավելի վաղ ցուցմունքն այն մասին, որ նա կանխել է դրա տեղի ունենալը (տե՛ս վերելում՝ 14-րդ պարբերությունը):

17. Նույն ամսաթվին ավագ լեյտենանտ Հ.Հ.-ն հարցաքննվել է որպես վկա: Նա, ի թիվս այլ հարցերի, նշել է, որ Տ.Վարյանը հաճախ է հերթապահել կրտսեր սերժանտ Է.Ս.-ի եւ շարքային Ռ.Ա.-ի փոխարեն: Ավագ լեյտենանտ Հ.Հ.-ն հենց ինքը եւ մնացած բոլորն անընդհատ ծաղրում էին Տ. Վարյանին, քանի որ նա դանդաղաշարժ էր ու միամիտ: Զինճառայողները նրան մականուններ էին կապնում, հայիոյում էին ու շահագործում նրան՝ իր միամտության պատճառով, այդ թվում՝ ստիպելով նրան մաքրություն անել, նույնիսկ եթե նա հերթապահության չէր լինում: Ավագ լեյտենանտ Հ.Հ.-ն խոստովանել է, որ ինքը նույնպես որոշակի պատասխանատվություն է կրում Տ. Վարյանի

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

ինքնասպանության համար: Ինչ վերաբերում է մասնավորապես Ս. Վարյանի մահվան օրվան, նա հայտնել է, որ արթնացել է ժամը 09:20-ի սահմաններում, իրեն ասել են, որ Ս. Վարյանին չեն կարողանում գտնել: Դրանից անմիջապես հետո կրտսեր սերժանտ Է.Ս.-ն գնացել է հենակետ եւ մեկ րոպե անց վերադարձել՝ ասելով, որ Ս. Վարյանն ինքնասպանություն է գործել: Սկզբում նա մտածել է, որ կրտսեր սերժանտ Է.Ս.-ն կատակում է, բայց երբ Է.Ս.-ն կրկնել է իր ասածը, Հ.Հ.-ն անմիջապես գնացել է հենակետ, որտեղ հայտնաբերել է Ս. Վարյանին՝ գետնին պռակած, նրա գլուխը, պարանոցը եւ աջ ուսը արյան մեջ: Երբ նրան խնդրել են մեկնաբանել շարքային Ռ.Ա.-ի ցուցմունքը (տե՛ս վերելում՝ 14-րդ պարբերությունը), որ նա հենակետ է գնացել այդ օրը առավոտյան ժամը 9:10-ի սահմաններում, ավագ լեյտենանտ Հ.Հ.-ն հերքել է, որ այդպիսի բան է եղել՝ պնդելով, որ ինքը հենակետ է բարձրացել ժամը 10:00-ի սահմաններում, երբ իրեն հայտնել են, որ Ս. Վարյանն այնտեղ ինքնասպանություն է գործել:

18. Նույն ամսաթվին ավագ սերժանտ Վ.Ն.-ն հարցաքննվել է: Նա պնդել է, որ տեղյակ է եղել 2011 թվականի նոյեմբերին տեղի ունեցած միջադեպի մասին, երբ ավագ լեյտենանտ Հ.Հ.-ն գոտու պատճառով վատ վերաբերմունք էր դրսևորել Ս. Վարյանի նկատմամբ (տե՛ս վերելում՝ 16-րդ պարբերությունը):

19. 2012 թվականի մարտի 2-ին քննիչը դատամատնահետքաբանական եւ դատաձգաբանական փորձաքննություն է նշանակել: Կառավարության կողմից տրամադրված համապատասխան որոշման պատճենն անընթեռնելի է:

20. 2012 թվականի մարտի 3-ին քննիչը հարցաքննել է ավագ լեյտենանտ Հ.Հ.-ին՝ որպես գործով կասկածյալ: Որպես իր նախորդ ցուցմունքի լրացում (տե՛ս վերելում՝ 17-րդ պարբերությունը) նա նշել է, որ դիակը հայտնաբերելուց հետո որոշել է այնպես անել՝ ասես ինքնասպանություն գործելիս Ս. Վարյանը հերթապահության է եղել, որպեսզի խուսափի հենակետում նրա լինելու մասով բացատրություն տալուց, այն դեպքում, երբ նա չպետք է հերթապահության լիներ: Քանի որ Ս. Վարյանը եղել է առանց սաղավարտի, գոտու կամ փամփշտատուփի համար նախատեսված պայուսակի, Հ.Հ.-ն վերադարձել է կացարան եւ նշված

իրերը տարել հենակետ: Այնուհետև նա այրել է հենակետում հերթապահության ժամերին վերաբերող զինվորական փաստաթղթերը եւ նոր փաստաթղթեր կազմել, ըստ որոնց՝ Տ. Վարյանը մարտական հերթապահություն է իրականացրել հենակետում առավոտյան ժամը 8:00-ից մինչեւ 10:00-ն: Դրանից հետո նա շարքային Ռ.Ա.-ին եւ կրտսեր սերժանտ Է.Ս.-ին տվել է փաստաթղթեր, որոնք բովանդակել են անվտանգության կանոնները, որոնց պետք է ենթարկվել հերթապահություն իրականացնելիս, որպեսզի նրանք ստորագրեն իրենց անուններից, իսկ Տ. Վարյանի փոխարեն ստորագրել էր հենց ինքը: Ժամը 10:00-ի սահմաններում նա ռադիոյով կապ է հաստատել զորամասի հրամանատարի հետ եւ հայտնել մահվան մասին:

21. Նույն ամսաթվին կրտսեր սերժանտ Է.Ս.-ն կրկին հարցաքննվել է (տե՛ս վերելում՝ 13-րդ եւ 16-րդ պարբերությունները) որպես վկա: Նա մասնավորապես նշել է, որ դեպքի օրը ավագ լեյտենանտ Հ.Հ.-ն մեկ անգամ չէ, որ գնացել է հենակետ, իսկ մահվան մասին հայտնել է դիակը հայտնաբերելուց մոտ երեսուն-քառասուն րոպե անց միայն: Նա նաեւ նշել է, որ ստել է այն մասին, որ ինքն ու շարքային Ռ.Ա.-ն նախորդ երեկո նրանց թողել են հենակետում՝ փայտ կտրելու համար (տե՛ս վերելում՝ 13-րդ պարբերությունը): Իրականում ինքն ու շարքային Ռ.Ա.-ն անձնական գործերով գնացել էին մեկ այլ հենակետ: Կրտսեր սերժանտ Է.Ս.-ն նույնպես հավելել է, որ ավագ լեյտենանտ Հ.Հ.-ն հաճախ էր ոչ պատշաճ զրույցներ ունենում Տ.Վարյանի հետ, որոնց ժամանակ Հ.Հ.-ն ծաղրում էր նրան, քանի որ Տ. Վարյանն իրեն ասել էր, որ երբեւէ աղջկա հետ չէր եղել:

22. Նույն օրը քննիչը հարցաքննել է զորամասի խոհարար կրտսեր սերժանտ Գ.Մ.-ին (տե՛ս վերելում՝ 14-րդ պարբերությունը) որպես վկա: Կրտսեր սերժանտ Գ.Մ.-ն հայտնել է, որ փետրվարի 15-ից 20-ն ընկած ժամանակահատվածում ինքը բռնել է Տ. Վարյանին եւ հարվածել՝ խոհանոցում իր պարտականությունները ոչ պատշաճ կատարելու համար: Նա նաեւ խոսել է 2012 թվականի հունվարի 25-ից 27-ն ընկած ժամանակահատվածում մի դրվագի մասին, երբ ականատես է եղել, թե ինչպես է ավագ լեյտենանտ Հ.Հ.-ն հայիոյում

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

Տ. Վարյանին եւ հարվածում նրան, քանի որ երբ Հ.Հ.-ն խնդրել է Տ. Վարյանին գնալ իր գլխարկը բերելու, վերջինս պատասխանել է, որ ինքը չի կարող դա անել միանգամից, քանի որ ձեռքերը մաքուր չեն: Դրանից հետո ավագ լեյտենանտ Հ.Հ.-ն դուրս է եկել խոհանոցից, իսկ Տ. Վարյանը լացել է: Կրտսեր սերժանտ Գ.Մ.-ն այդ դեպքի մասին չէր հայտնել եւ չէր հիշում, որ Տ. Վարյանն այդ միջադեպի հետեւանքով որեւէ տեսանելի վնասվածք ունենար:

23. Նույն ամսաթվին կատարվել է առերեսում կրտսեր սերժանտ Է.Ս.-ի եւ շարքային Ռ.Ա.-ի միջեւ, որի ընթացքում վերջինս համաձայնել է, որ 2012 թվականի փետրվարի 28-ի երեկոյան ավագ լեյտենանտ Հ.Հ.-ն նույնպես հարվածել է Տ. Վարյանին (տե՛ս վերելում՝ 14-րդ եւ 16-րդ պարբերություններում գործի վերաբերյալ Ռ.Ա.-ի նախկին ցուցմունքը): Շարքային Ռ.Ա.-ն պնդել է, որ 2012 թվականի փետրվարի 27-ին եւ 28-ին կրտսեր սերժանտ Է.Ս.-ն մի քանի անգամ հարվածել է Տ. Վարյանին: Նա նաեւ հայտնել է, որ 2012 թվականի փետրվարի 29-ի առավոտյան ժամը 9:00-ի սահմաններում ավագ լեյտենանտ Հ.Հ.-ն գնացել է հենակետ: Շարքային Ռ.Ա.-ն ժամը 9:20-ի սահմաններում կրակոց է լսել, իսկ կրտսեր սերժանտ Է.Ս.-ն դիակը հայտնաբերել է առավոտյան ժամը 9:50-ի սահմաններում:

24. 2012 թվականի մարտի 4-ին կատարվել է առերեսում շարքային Ռ.Ա.-ի եւ ավագ լեյտենանտ Հ.Հ.-ի միջեւ, որի ընթացքում վերջինս հերքել է, որ ինքը 2012 թվականի փետրվարի 29-ի առավոտյան ժամը 9-ի սահմաններում հենակետ է գնացել:

25. Նույն ամսաթվին կատարվել է առերեսում կրտսեր սերժանտ Է.Ս.-ի եւ ավագ լեյտենանտ Հ.Հ.-ի միջեւ, որի ընթացքում Է.Ս.-ն նաեւ նշել է, որ 2012 թվականի փետրվարի 29-ի առավոտյան ժամը 9-ի սահմաններում Հ.Հ.-ն գնացել է հենակետ եւ վերադարձել մոտ տասը րոպե անց: Իր հերթին ավագ լեյտենանտ Հ.Հ.-ն հերքել է, որ Տ. Վարյանը 2011 թվականի դեկտեմբերին կամ 2012 թվականի փետրվարի 28-ի երեկոյան ծեծի է ենթարկվել զուգարանի պատճառով (տե՛ս վերելում՝ 13-րդ, 16-րդ եւ 23-րդ պարբերությունները):

26. 2012 թվականի մարտի 5-ին ստորաբաժանման հրամանատարության սպա, կապիտան Ա.Հ.-ն հարցաքննվել է եւ, ի թիվս այլնի, նշել, որ Տ. Վարյանը եղել է փոքրահասակ, ֆիզիկապես թերզարգացած եւ նույնիսկ թույլ: Նա նաեւ միամիտ էր, եւ նրա ծառայակիցները սովորաբար կատակում էին նրա հետ: Ավագ լեյտենանտ Հ.Հ.-ն չէր կարողանում պատշաճ կերպով ղեկավարել անձնակազմը, եւ մարտական հերթապահությունը չէր կազմակերպվում այնպես, ինչպես հարկն էր: Այնուամենայնիվ, կապիտան Ա.Հ.-ն որեւէ հստակ տեղեկություն չի ունեցել, եւ քանի որ իրեն հայտնել են, որ ամեն ինչ լավ է, նա որեւէ միջոց չի ձեռնարկել պարզելու, թե իրականում ինչ է կատարվում: Նա հայտնել էր ավագ լեյտենանտ Հ.Հ.-ի կողմից իր պարտականությունները կատարելու հարցում թերանալու մասին, սակայն իր վերադասն այդ կապակցությամբ որեւէ միջոց չէր ձեռնարկել: Կապիտան Ա.Հ.-ի կարծիքով՝ զինծառայողները պարզապես կատակում էին Տ. Վարյանի հետ, այլ ոչ թե ծաղրում նրան:

Բ. Ավագ լեյտենանտ Հ.Հ.-ին, կրտսեր սերժանտ Է.Ս.-ին եւ կրտսեր սերժանտ Գ.Մ.-ին առաջադրված մեղադրանքները

27. 2012 թվականի մարտի 6-ին ավագ լեյտենանտ Հ.Հ.-ին մեղադրանք է առաջադրվել իշխանությունը չարաշահելու (նախկին Քրեական օրենսգրքի 375-րդ հոդվածի 1-ին մաս. տե՛ս ստորել՝ 54-րդ պարբերությունը) եւ մարտական ծառայություն կրելու կանոնները խախտելու համար (նախկին Քրեական օրենսգրքի 365-րդ հոդվածի 1-ին մաս. տե՛ս ստորել՝ 53-րդ պարբերությունը):

28. Նույն ամսաթվին ավագ լեյտենանտ Հ.Հ.-ն հարցաքննվել է որպես մեղադրյալ: Նա խոստովանել է, որ 2011 թվականի նոյեմբերին ծեծի է ենթարկել Տ. Վարյանին՝ հերթապահության ժամանակ քնելու համար, եւ որ նույն ամսին կրկին ծեծել է նրան գոտու պատճառով (տե՛ս վերելում՝ 16-րդ պարբերությունը՝ այդ մասով շարքային Ռ.Ա.-ի տված ցուցմունքը): Նա հերքել է, որ գլխարկի պատճառով խոհանոցում վիճել է Տ. Վարյանի հետ (տե՛ս վերելում՝ 22-րդ պարբերությունը՝ այդ մասով կրտսեր սերժանտ Գ. Մ.-ի տված ցուցմունքը),

ինչպես նաև որ վիրավորել եւ վատ է վերաբերվել Տ. Վարյանին՝ վերջինիս կողմից զուգարանը պատահաբար կեղտոտելու պատճառով (տե՛ս վերելում՝ 13-րդ պարբերությունը): Նա խոստովանել է, որ դեպքի նախորդ օրը՝ 2012 թվականի փետրվարի 28-ի երեկոյան, հայիոյել է Տ. Վարյանին, սակայն հերքել է, որ այդ օրը հարվածել է նրան:

29. 2012 թվականի մարտի 7-ին կրտսեր սերժանտ Է.Ս.-ին մեղադրանք է առաջադրվել զինճառայողների փոխհարաբերությունների կանոնագրքային կանոնները խախտելու համար (նախկին Քրեական օրենսգրքի 359-րդ հոդվածի 1-ին մաս. տե՛ս ստորել՝ 52-րդ պարբերությունը): Նույն օրը նա հարցաքննվել է որպես մեղադրյալ եւ, ի թիվս այլնի, կրկնել է իր նախորդ ցուցմունքը (տե՛ս վերելում՝ 13-րդ պարբերությունը), որ ավագ լեյտենանտ Հ.Հ.-ն կացարան դուրս է եկել հենակետ գնալու համար՝ նախքան մարմինը հայտնաբերելը:

30. 2012 թվականի մարտի 12-ին կրտսեր սերժանտ Գ.Մ.-ին մեղադրանք է առաջադրվել իշխանությունը չարաշահելու համար (նախկին Քրեական օրենսգրքի 375-րդ հոդվածի 1-ին մաս, տե՛ս ստորել՝ 54-րդ պարբերությունը): Նույն ամսաթվին նա հարցաքննվել է որպես մեղադրյալ եւ խոստովանել, որ 2012 թվականի փետրվարի 21-ին, երբ Տ. Վարյանը խոհանոցում հերթապահում էր, ինքը հարվածել է նրան՝ մաքրությունը չավարտելու համար (տե՛ս շարքային Ռ. Ա.-ի ցուցմունքը, որն ամփոփված է վերելում՝ 14-րդ պարբերության վերջում):

31. 2012 թվականի մարտի 19-ին դիմումատուն վարույթում ճանաչվել է մահացածի իրավահաջորդ: Նույն օրը նա ծանոթացել է քննիչի՝ դատաբժշկական փորձաքննություններ նշանակելու վերաբերյալ որոշումներին (տե՛ս վերելում՝ 11-րդ եւ 19-րդ պարբերությունները):

Գ. Դիահերձման եզրակացությունը եւ դատաբժշկական մյուս ապացույցները

32. 2012 թվականի մարտի 22-ին քննիչը նշանակել է դատակենսաքիմիական փորձաքննություն՝ պարզելու, թե արդյոք դեպքի վայրում

հայտնաբերված Տ. Վարյանի ինքնաձիգի վրա արյան հետքեր եղել են, թե՛ ոչ, եւ եթե այո, ապա արդյոք դրանք համապատասխանել են Տ. Վարյանի արյան խմբին:

33. 2012 թվականի ապրիլի 2-ին ստացվել է դիախերձման եզրակացությունը (տե՛ս վերելում՝ 11-րդ պարբերությունը): Դրանում մասնավորապես նշվում էր, որ Տ.Վարյանի մահը վրա է հասել գլխին հասցված ծակող հրազենային վնասվածքի հետեանքով գլխուղեղի ֆունկցիայի խանգարման պատճառով. հրազենային վերքի մուտքը տեղակայված է եղել կզակի տակի հատվածում, իսկ ելքային վերքը՝ գլխի հետեւի մասում՝ ճակատի հետեւում: Գանգի, կզակի եւ բերանի շրջանում մի շարք վնասվածքներ վերագրվել են հրազենային վնասվածքի: Մարմնի վրա հայտնաբերվել են նաեւ հետեւյալ վնասվածքները՝ քթի մեջքի մակերեսային վերքեր եւ քթին մոտ գտնվող աջ եւ ձախ կոպերի հատվածներում վերքեր, որոնք մահվանից կարճ ժամանակ (վայրկյաններ) առաջ հասցվել են ամուր, բութ առարկայով (կամ առարկաներով), եւ որոնք անմիջականորեն կապ չեն ունեցել մահվան հետ:

34. 2012 թվականի օգոստոսի 15-ին ձգաբանական եւ դատաբժշկական փորձագետների հանձնաժողովը եկել է համատեղ եզրակացության, ըստ որի, *inter alia*, Տ. Վարյանի մարմնին հասցված հրազենային վնասվածքը կարող էր պատճառված լինել իր կամ այլ անձի կողմից:

35. 2012 թվականի օգոստոսի 24-ին ավագ լեյտենանտ Հ.Հ.-ին առաջադրված մեղադրանքները փոփոխվել են եւ նրան մեղադրանք է առաջադրվել նախկին Քրեական օրենսգրքի 375-րդ հոդվածի 2-րդ մասով (տե՛ս ստորել՝ 55-րդ պարբերությունը)՝ պաշտոնեական դիրքը խիստ չարաշահելու համար, եւ մարտական ծառայություն կրելու կանոնները խախտելու համար (նախկին Քրեական օրենսգրքի 365-րդ հոդվածի 1-ին մաս. տե՛ս ստորել՝ 53-րդ պարբերությունը):

36. 2012 թվականի սեպտեմբերին՝ չպարզված ամսաթվի, քննիչը հարցաքննել է դիահերձումն իրականացրած դատաբժշկական փորձագետին (տե՛ս վերելում՝ 11-րդ և 33-րդ պարբերությունները): Փորձագետին ցույց են տվել դեպքի վայրի զննության ընթացքում արված լուսանկարները (տե՛ս վերելում՝ 10-րդ պարբերությունը) և հարցրել, մասնավորապես, թե արդյոք Ս. Վարյանի մարմնի վրա առկա ոչ հրազենային վնասվածքները ստացվել են կրակոցից առաջ, թե հետո, և եթե հետո, ապա արդյոք դրանք կարող էին առաջանալ կրակոցից, թե ինքնաձիգի շարժումից: Ի պատասխան՝ փորձագետը նշել է, որ հաշվի առնելով վնասվածքների տեղակայումը և բնույթը՝ դրանք, ամենայն հավանականությամբ, ստացվել են կրակոցից հետո՝ փամփուշտի շեղման հետեանքով:

37. 2012 թվականի նոյեմբերի 15-ին փորձագետների հանձնաժողովը, որին հանձնարարվել էր Ս. Վարյանի նկատմամբ անցկացնել հետմահու դատահոգեբուժական փորձաքննություն, տվել է իր եզրակացությունը: Փորձագետների եզրակացության համապատասխան հատվածներն ունեն հետեյալ բովանդակությունը.

«... Ս.Վարյանը հոգեկան որեւէ խանգարմամբ չի տառապել: Իր ծառայակիցների կողմից մշտական նվաստացումների, բռնությունների, վիրավորանքների և ստորացումների հետեանքով... [նրա մահը] վրա հասնելու պահին նա ունեցել է հոգեկան գործունեության ժամանակավոր խանգարում, որն ուղեկցվել է հուսահատությամբ [և] ցածր ինքնագնահատականով... որն էլ եղել է նրա ինքնասպանության պատճառը...»

Եզրակացություններ՝

...

[կրտսեր սերժանտ Գ. Մ.]-ի հետ վեճը և Ս. Վարյանի նկատմամբ [Գ.Մ.-ի] գործողություններն ընկճել են նրան, բայց միայն այդ երեսույթները դժվար թե նրան ինքնասպանության հասցնեին:

[կրտսեր սերժանտ Է.Ս.]-ի հետ վեճը և Ս. Վարյանի նկատմամբ [Է.Ս.-ի] գործողություններն ընկճել են նրան, բայց միայն այդ երեսույթները դժվար թե նրան ինքնասպանության հասցնեին:

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

[Ավագ լեյտենանտ Հ.Հ.-ի կողմից Ս. Վարյանի հասցեին հնչեցված արտահայտություններն ու նրա նկատմամբ կիրառված բռնությունն իրականում կարող էին վերջինիս դրդել ինքնասպանության:

[Կրտսեր սերժանտ Գ.Մ.-ի], [կրտսեր սերժանտ Է.Ս.-ի] եւ [ավագ լեյտենանտ Հ.Հ.-ի] գործողությունները համատեղ Ս. Վարյանին դրդել են ինքնասպանության»:

Դ. Մեղադրական եզրակացությունը

38. 2013 թվականի հունվարի 14-ին գործն ուղարկվել է Այունիքի մարզային դատարան՝ այն ըստ էության քննելու համար: Մեղադրական եզրակացության համապատասխան մասերն ունեն հետեւյալ բովանդակությունը.

«... 2011 թվականի նոյեմբերին... [ավագ լեյտենանտ Հ.Հ.-ն] ... ոտքով հարվածել է շարքային [Ս. Վարյանի] գլխին՝ հենակետում հերթապահության ժամանակ քնելու համար ...

...

Բացի այդ, նաեւ 2011 թվականի նոյեմբերին [ավագ լեյտենանտ Հ.Հ.-ն] ... վիճաբանել է [Ս. Վարյանի] հետ՝ զուգարանի համար փոս փորելու հրամանին [վերջինիս կողմից] չենթարկվելու պատճառով, որի ընթացքում հայհոյել է [Ս. Վարյանին] եւ բռունցքով երեք անգամ հարվածել նրա կրծքավանդակին...

...

Այդ գործողությունների արդյունքում [Ս. Վարյանը] կրակել է ինքն իրեն...

... 2012 թվականի փետրվարի 29-ին՝ ժամը 10:00-ի սահմաններում... [կրտսեր սերժանտ Է.Ս.-ն] գնացել է հենակետ եւ տեսել շարքային [Ս. Վարյանին] գետնին՝ արյունահոսող գլխով, հրացանը՝ կրծքին: Կացարան վերադառնալով՝ նա [ավագ լեյտենանտ Հ.Հ.-ին] հայտնել է, որ շարքային [Ս. Վարյանը] ինքնասպանություն է գործել: [Ավագ լեյտենանտ Հ.Հ.-ն] գնացել է հենակետ եւ վերադառնալուց հետո շարքային [Ս. Վարյանի] զինվորական սաղավարտն ու նրա գոտին (որին ամրացված էր պահեստային փամփշտատուփերով պայուսակը) տարել է հենակետ, որպեսզի տպավորություն ստեղծվի, թե [Ս. Վարյանն] ինքնասպանություն գործելիս հերթապահության է եղել... Այնուհետեւ [ավագ լեյտենանտ Հ.Հ.-ն] այրել է մարտական հենակետում [հերթապահության ժամերին վերաբերող] փաստաթղթերն ու դրանց փոխարեն կազմել նոր փաստաթղթեր, համաձայն որոնց՝ շարքային [Ս. Վարյանը] ժամը 08:00-ից մինչեւ 10:00-ն հերթապահել է. [ավագ

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

[Եյտենանտ Հ.Հ.-ն], [կրտսեր սերժանտ Է.Ս.-ն] եւ [շարքային Ռ.Ա.-ն] ստորագրել են [նոր կազմված փաստաթղթերը] ու ստորագրել են [Տ. Վարյանի] փոխարեն ... [ավագ [Եյտենանտ Հ.Հ.-ն այնուհետեւ ասել է, որ ... [կրտսեր սերժանտ Է.Ս.-ն] եւ ... [շարքային Ռ.Ա.-ն] բոլորին ասեն, որ շարքային [Տ. Վարյանը] ունեցել է ընտանեկան խնդիրներ, ինչի պատճառով էլ ինքնասպանություն է գործել...

2012 թվականի փետրվարի 27-ին... [կրտսեր սերժանտ Է.Ս.-ն] ... ստորագրել է շարքային [Տ. Վարյանին] եւ բռունցքով հարվածել նրա կրծքավանդակին... Բացի այդ, 2012 թվականի փետրվարի 28-ին ... [կրտսեր սերժանտ Է.Ս.-ն] ... ստորագրել է շարքային [Տ. Վարյանին] եւ առանց որեւէ հիմնավորման՝ բռունցքով հարվածել է նրա կրծքին:

2012 թվականի փետրվարի 21-ին... [կրտսեր սերժանտ Գ.Մ.-ն] ստորագրել է [Տ. Վարյանին] եւ բռունցքով երեք անգամ հարվածել նրա կրծքավանդակին...»:

III. ԴԻՄՈՒՄԱՏՈՒԻ ՈՐԴՈՒ ՄԱՀՎԱՆ ՀԱՆԳԱՄԱՆՔՆԵՐԻ ՄԱՍՈՎ ԾԱՌԱՅՈՂԱԿԱՆ ՔՆՆՈՒԹՅՈՒՆԸ

39. 2012 թվականի փետրվարի 29-ին՝ այդ միջադեպի օրը (տե՛ս վերելում՝ 8-րդ պարբերությունը), Լեռնային Ղարաբաղի պաշտպանության բանակի հրամանատարը հանձնարարել է իրականացնել Տ. Վարյանի մահվան հանգամանքների ծառայողական քննություն: Այդ նպատակով ստեղծվել է հատուկ հանձնաժողով (ծառայողական հանձնաժողով):

40. Չպարզված ամսաթվին ծառայողական հանձնաժողովը, ծառայողական քննության արդյունքների հիման վրա, զեկույց է ներկայացրել Լեռնային Ղարաբաղի պաշտպանության բանակի հրամանատարին: Չեկույցի համապատասխան մասերն ունեն հետեւյալ բովանդակությունը.

«... Ըստ նախնական տեղեկությունների՝ [Տ. Վարյանը] ինքնասպանություն է գործել:

... Շարքային [Տ. Վարյանը] բնութագրվում է դրական... որպես կարգապահ եւ բարեխիղճ զինծառայող: Նա բանակ է զորակոչվել զինծառայողների պիտանելիությունը որոշող հիվանդությունների ցանկի 26-րդ կետի «դ» ենթակետով [սրտանոթային հիվանդություններ] եւ 17-րդ կետի «բ» ենթակետով [ֆիզիկական թերզարգացածություն] [Պաշտպանության նախարարի 2010 թվականի փետրվարի 26-ի թիվ 175 հրամանի թիվ 1

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

հավելվածի 26-րդ կետի «դ» ենթակետ եւ 17-րդ կետի «բ» ենթակետ]... կանոնավոր բժշկական զննումների ժամանակ [նա] որեւէ գանգատ չի ունեցել:

[Հայաստանի Հանրապետության պաշտպանության նախարարության] երրորդ կայազորի քննչական բաժնի կողմից մեկնարկած գործի քննությունն ընթացքի մեջ է:

Միջադեպից մոտ երկու ամիս առաջ շարքային [Տ. Վարյանը] [կրտսեր սերժանտ Է.Ս.]-ի կողմից նկատողություն է ստացել եւ ստորացվել՝ հենակետում հերթապահություն իրականացնելու ժամանակ քնելու համար...

Նույն ժամանակահատվածում... [Տ. Վարյանը] մթության պատճառով կեղտոտել է ... զուգարանը, ինչի արդյունքում նրան նվաստացրել է ... [կրտսեր սերժանտ Է.Ս.-ն]: Վերջինիս ակտիվ մասնակցությամբ եւ [ավագ լեյտենանտ Հ.Հ.-ի] հրամանի համաձայն՝ ... շարքային [Տ. Վարյանը] սկսել է մեկ այլ տարածքում զուգարանի փոս փորել:

[Դեպքից երկու օր առաջ] ... [կրտսեր սերժանտ Է.Ս.-ն] ստորացրել է [Տ. Վարյանին] հենակետը բավարար չափով մաքուր չպահելու համար ... [եւ] բռունցքով հարվածել է նրա կրծքավանդակին ու ստիպել նորից մաքրել տարածքը:

Փետրվարի 28-ին՝ ժամը 21:00-ի սահմաններում... [ավագ լեյտենանտ Հ.Հ.-ն] ստորացրել է Տ. Վարյանին: Ի պատասխան սպառնալիքների՝ շարքային [Տ. Վարյանը] ոչինչ չի ասել: Շարունակելով վիճաբանությունը՝ [ավագ լեյտենանտ Հ.Հ.-ն] հավելել է, որ նրա [ավագ լեյտենանտ Հ.Հ.-ի] մեղքով է, որ [շարքային Տ. Վարյանը] մինչ այդ չի ավարտել զուգարանի փոսը փորելը եւ պահանջել է, որ հաջորդ օրը շարունակի փորել ...

Ըստ [կրտսեր սերժանտ Է.Ս.-ի] եւ [շարքային Ռ.Ա.-ի] տված ցուցմունքների՝ 2012 թվականի փետրվարի 29-ի առավոտյան ժամը 9:00-ի սահմաններում, այսինքն՝ դեպքի օրը, ... [ավագ լեյտենանտ Հ.Հ.-ն] գնացել է հենակետ, որտեղ շարքային [Տ. Վարյանը] հերթապահում էր, եւ տասը բոպե անց վերադարձել է կացարան: Մոտավորապես տասը-տասնհինգ բոպե անց կրակոց է լսվել: Բոլորը բարձրացել են հենակետ եւ հայտնաբերել շարքային [Տ. Վարյանի] մարմինը: Այնուհետեւ... [ավագ լեյտենանտ Հ.Հ.-ն] անձնակազմին հրամայել է ոչ մեկին չպատմել շարքային [Տ. Վարյանի] ինքնասպանությանը նախորդող դեպքերի մասին եւ ասել, որ նա ինքնասպանություն է գործել մի աղջկա պատճառով, որին նա հավանում էր... Ըստ [ավագ լեյտենանտ Հ.Հ.-ի] հաղորդման՝ դեպքի օրն ինքը հենակետ չի գնացել ...

Պարզվել է, որ [Տ. Վարյանը] հեղինակություն չի ունեցել, նրան հաճախ են ծաղրել ու նվաստացրել: [Այդ գործում] հատկապես ակտիվ էր [կրտսեր սերժանտ Է.Ս.-ն]:

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

...

Ծառայողական քննությամբ բացահայտվել են հետեւյալ թերությունները.

- ... [ավագ լեյտենանտ Հ.Հ.-ն] չի կարողացել կազմակերպել մարտական հերթապահությունը՝ թողնելով, որ այն [կազմակերպվի] առանց վերահսկողության: Նրա անգործության հետեւանքով զինծառայողների շրջանում գլուխ է բարձրացրել հանցավոր վարքագիծը. [Տ. Վարյանի] ինքնասպանության մեջ հատկապես զգալի է [կրտսեր սերժանտ Է.Ս.-ի] եւ [շարքային Ռ.Ա.-ի] մեղավորության աստիճանը:

- Սահմանված հերթապահությունը հաճախ չէր պահպանվում, եւ շարքային [Տ. Վարյանը] հերթապահում էր ... [կրտսեր սերժանտ Է.Ս.-ի] եւ ... [շարքային Ռ.Ա.-ի] փոխարեն ...

- Զորամասի հրամանատարությունը բացասաբար է բնութագրում [ավագ լեյտենանտ Հ.Հ.-ին], սակայն նա երբեւէ նկատողություն չի ստացել...

...

Հետեւյալ [գործոնները] նպաստել են [Տ. Վարյանի] ինքնասպանությանը.

- լինելով բնականից թույլ ու անինքնավստահ՝ նա ընկել է ստորաբաժանումում «հեղինակություն» ունեցող զինծառայողների ազդեցության տակ եւ դարձել բռնության զոհ...

- [կրտսեր սերժանտ Է.Ս.-ի] կողմից ստորացումն ու նկատողությունը հենակետում քնելու համար.

- մշտական նվաստացումներն ու [կրտսեր սերժանտ Է.Ս.-ի] կողմից հնչած հայհոյանքները

- [պարտականությունների] անարդար բաշխումը, որի արդյունքում [Տ. Վարյանին] անընդհատ ծանր ֆիզիկական աշխատանք էր հանձնարարվում

- [վերոնշյալ գործոնների հետեւանքով] [Տ. Վարյանի] հեղինակազրկվելը, ինչն էլ հանգեցրել է սեփական կյանքին վերջ տալու որոշմանը...

Միջադեպը տեղի է ունեցել ... զորամասի հրամանատարության վատ վերահսկողության արդյունքում ... զինծառայողները ղեկավարվում են փողոցային կանոններով, եւ պատահում են զինծառայողների նվաստացման եւ ստորացման դեպքեր ... որոշ գործեր համարվում են ամոթալի եւ անարժանապատիվ, ինչը հանգեցնում է «ուժեղների եւ թույլերի» օրենքի գերակայությանը, [այնպես, որ], որպես կանոն, այդ տեսակի աշխատանքները կատարում են «թույլերը»:

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

41. 2012 թվականի մարտի 13-ին Հայաստանի պաշտպանության նախարարը ծառայողական քննության արդյունքների հիման վրա (տե՛ս վերելում՝ 40-րդ պարբերությունը) հրաման է արձակել, համաձայն որի դեպքի առնչությամբ զորամասի հրամանատարին, նրա տեղակալին եւ զորամասի հրետանու պետին նկատողություն է տրվել: Ջորամասի հրետանու պետը տեղափոխվել է ռեզերվ: Ջեկույցի համապատասխան մասերն ունեն հետեւյալ բովանդակությունը.

«[Տ. Վարյանը] զորակոչվել է [Պաշտպանության նախարարի 2010 թվականի փետրվարի 26-ի թիվ 175 հրամանի թիվ 1 հավելվածի] 26-րդ կետի «դ» ենթակետի եւ 17-րդ կետի «բ» ենթակետի հիման վրա...

... միջադեպը հնարավոր էր կանխել, եթե՝

...

3) «Ինքնասպանության եւ ինքնավնասման դեպքերի կանխարգելման ... խումբը» կոնկրետ կանխարգելիչ աշխատանքներ իրականացնելու գինձառայողների հետ.

...

6) գինձառայողների միջեւ բախումներն ու համակրանքի բացակայությունը կանխվելին հենակետում վերադաս սպայի կողմից, եւ այդ մասին զեկուցվել հրամանատարությանը.

...

9) ... [Տ. Վարյանը] ծառայակիցների եւ նրա անմիջական հրամանատարի կողմից մշտական բռնությունների չենթարկվել...

10) համապատասխան պաշտոնյաները ժամանակին քննելին [Տ. Վարյանի] ֆիզիկապես թույլ, ինքնամեկուսացված եւ անինքնավստահ լինելու հանգամանքը ու կանխարգելիչ միջոցառումներ ձեռնարկելին.

11) տիրեր պատշաճ բարոյական մթնոլորտ եւ գինձառայողները չդեկավարվելին ոչ կանոնադրական ու փողոցային բարքերով. չլինելին գինձառայողների նվաստացման եւ ստորացման դեպքեր. ... եւ առօրյա աշխատանքները միայն «թույլ» գինձառայողներին չհանձնարարվելին...»:

IV. ԴԱՏԱՔՆՆՈՒԹՅՈՒՆԸ

Ա. Առաջին ատյանի դատարանում դատաքննությունը

42. Չպարզված ամսաթվին Լեռնային Ղարաբաղի Ստեփանակերտ քաղաքում գտնվող Սյունիքի մարզային դատարանում (Մարզային դատարան) մեկնարկել է ավագ լեյտենանտ Հ.Հ.-ի եւ կրտսեր սերժանտներ Է.Ս.-ի եւ Գ.Մ.-ի նկատմամբ հարուցված գործի դատաքննությունը:

43. Դատաքննության ընթացքում մեղադրողը միջնորդել է կրտսեր սերժանտ Գ.Մ.-ի նկատմամբ առաջադրված մեղադրանքը (տե՛ս վերելում՝ 30-րդ պարբերությունը) վերադրակել ըստ նախկին Քրեական օրենսգրքի վերջերս ընդունված 358.1 հոդվածի 2-րդ մասի (տե՛ս ստորել՝ 51-րդ պարբերությունը):

44. Դատաքննության ընթացքում դիմումատուն պնդել է, որ իր որդու մահվան հանգամանքների քննությունն արդյունավետ չի եղել, քանի որ նրա մահվան հանգամանքները պատշաճ կերպով չեն հաստատվել: Դիմումատուն մասնավորապես պնդել է, որ չի պարզվել, որ իր որդին իսկապես ինքնասպանություն է գործել, այլ ոչ թե սպանվել է այլ անձի կամ անձանց կողմից: Բացի այդ, զգալի անհամապատասխանություններ են եղել ծառայողական քննությանը հաջորդած զեկույցում հաստատված փաստերի (տե՛ս վերելում՝ 40-րդ պարբերությունը) եւ մեղադրական եզրակացության մեջ նկարագրված իրադարձությունների վարկածի միջեւ (տե՛ս վերելում՝ 38-րդ պարբերությունը):

45. 2013 թվականի օգոստոսի 6-ին Մարզային դատարանն ավագ լեյտենանտ Հ.Հ.-ին մեղավոր է ճանաչել ըստ մեղադրանքի (տե՛ս վերելում՝ 35-րդ պարբերությունը) եւ դատապարտել նրան չորս տարի վեց ամիս ժամկետով ազատազրկման: Կրտսեր սերժանտներ Է.Ս.-ն եւ Գ.Մ.-ն նույնպես մեղավոր են ճանաչվել ըստ մեղադրանքի (տե՛ս վերելում՝ 29-րդ եւ 43-րդ պարբերությունները) եւ երկուսն էլ դատապարտվել են չորս ամիս ժամկետով ազատազրկման: Ավագ լեյտենանտ Հ.Հ.-ն եւ կրտսեր սերժանտներ Է.Ս.-ն եւ Գ.Մ.-ն բոլորը հրաժարվել են դատաքննության ընթացքում ցուցմունք տալուց: Մարզային դատարանը

հաստատված է համարել մեղադրական եզրակացության մեջ նկարագրված փաստերը (տե՛ս վերելում՝ 38-րդ պարբերությունը): Այն մասնավորապես եզրակացրել է, որ Տ. Վարյանի նկատմամբ ավագ լեյտենանտ Հ.Հ.-ի կողմից դրսևորված վարքագիծն ու գործողություններն անզգուշությամբ առաջացրել են վերջինիս ինքնասպանությունը, որ կրտսեր սերժանտ Է.Ս.-ն փետրվարի 27-ին եւ 28-ին Տ. Վարյանի նկատմամբ դաժան վերաբերմունք է դրսևորել ե՛լ բանավոր, ե՛լ ֆիզիկապես, եւ որ կրտսեր սերժանտ Գ.Մ.-ն փետրվարի 21-ին Տ. Վարյանին ենթարկել է բանավոր եւ ֆիզիկական բռնության (տե՛ս վերելում՝ 38-րդ պարբերությունը):

Բ. Դիմումատուի բողոքները

46. Դիմումատուն բողոք է ներկայացրել՝ պնդելով, մասնավորապես, որ վարույթով չեն բացահայտվել Տ.Վարյանի մահվան բոլոր հանգամանքները կամ պատժվել դրա մեղավորները, այդ թվում՝ զորամասի հրամանատարական կազմը: Դիմումատուն մանրամասնորեն հիմնավորել է, որ քննության ընթացքում չեն հաստատվել մահվան հետ կապված մի շարք կարեւոր փաստեր, ինչպիսիք են, *inter alia*, դիակի գտնվելու վայրն ու մահվան ժամը: Նա վերստին նշել է իր այն փաստարկը, որ էական հակասություններ կան ծառայողական քննության զեկույցի եւ քրեական գործով քննության ընթացքում փաստերի հաստատման եղանակի միջեւ (տե՛ս վերելում՝ 44-րդ պարբերությունը):

47. 2013 թվականի հոկտեմբերի 28-ին Վերաքննիչ քրեական դատարանն անփոփոխ է թողել Մարզային դատարանի դատավճիռը: Ինչ վերաբերում է դիմումատուի կողմից իր բողոքում բերված փաստարկներին, ապա Վերաքննիչ դատարանը նշել է հետեւյալը.

«Քրեական գործի նախաքննության եւ դատաքննության ընթացքում հաստատվել է, որ Տ. Վարյանի մահը վրա է հասել ինքնասպանության, այլ ոչ թե սպանության հետեանքով. ձեռնարկվել են բոլոր հնարավոր քննչական եւ դատավարական միջոցառումները՝ հանցագործությունը բացահայտելու համար, մեղավորները ենթարկվել են քրեական պատասխանատվության եւ պատժի»:

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

48. Դիմումատուն այդ որոշման դեմ վճռաբեկ բողոք է ներկայացրել՝ բերելով իր նախկին բողոքում հնչեցրած փաստարկներին համանման փաստարկներ:

49. 2013 թվականի դեկտեմբերի 27-ին Վճռաբեկ դատարանը դիմումատուի վճռաբեկ բողոքը հայտարարել է անընդունելի՝ հիմքերի բացակայության պատճառով:

ՀԱՄԱՊԱՏԱՍԽԱՆ ԻՐԱՎԱԿԱՆ ՇՐՋԱՆԱԿԸ

I. ՔՐԵԱԿԱՆ ՕՐԵՆՍԳԻՐՔ

50. Նախկին Քրեական օրենսգրքի համապատասխան դրույթները (ուժի մեջ՝ մինչև 2022 թվականի հուլիսի 1-ը) հետեյալն էին.

51. 358.1 հոդվածի 2-րդ մասով սահմանվում էր, որ զինվորական ծառայության պարտականությունները կատարելու կապակցությամբ ստորադասին ծեծելը կամ նրա նկատմամբ այլ բռնություն գործադրելը կամ դա գործադրելու սպառնալիքը ստորադասի նկատմամբ պատժվում է զինվորական ծառայության մեջ սահմանափակմամբ՝ մեկից երեք տարի ժամկետով, կամ կալանքով՝ մեկից երեք ամիս ժամկետով, կամ կարգապահական գումարտակում պահելով՝ առավելագույնը երեք տարի ժամկետով, կամ ազատազրկմամբ՝ առավելագույնը հինգ տարի ժամկետով:

52. 359-րդ հոդվածի 1-ին մասով սահմանվում էր, որ զինծառայողների փոխհարաբերությունների կանոնագրքային կանոնները խախտելը նրանց միջև ստորադասության հարաբերությունների բացակայության դեպքում, որն արտահայտվել է ծաղրուծանակի ենթարկելով կամ հալածելով կամ ծեծելով կամ այլ բռնի գործողություններ կատարելով, պատժվում է կարգապահական գումարտակում պահելով՝ առավելագույնը երկու տարի ժամկետով, կամ ազատազրկմամբ՝ առավելագույնը երկու տարի ժամկետով:

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

53. 365-րդ հոդվածի 1-ին մասով սահմանվում էր, որ Հայաստանի Հանրապետության վրա անակնկալ հարձակումը ժամանակին հայտնաբերելու եւ դրան դիմակայելու կամ Հայաստանի Հանրապետության անվտանգության ապահովմանն ուղղված մարտական հերթապահության կամ մարտական ծառայություն կրելու կանոնները խախտելը, եթե այդ արարքը վնաս է պատճառել, պատժվում է կարգապահական գումարտակում պահելով՝ առավելագույնը երեք տարի ժամկետով, կամ զինվորական ծառայության մեջ սահմանափակմամբ՝ մեկից երկու տարի ժամկետով, կամ ազատազրկմամբ՝ առավելագույնը երեք տարի ժամկետով:

54. 375-րդ հոդվածի 1-ին մասով սահմանվում էր, որ պետի կամ պաշտոնատար անձի կողմից իշխանությունը կամ պաշտոնեական դիրքը չարաշահելը, իշխանազանցությունը կամ պաշտոնեական լիազորությունների սահմանն անցնելը, ինչպես նաեւ իշխանության անգործությունը, եթե այդ արարքները կատարվել են շահադիտական, անձնական այլ շահագրգռվածությունից կամ խմբային շահերից ելնելով, եւ եթե դրանք էական վնաս են պատճառել՝ պատժվում էին ազատազրկմամբ՝ երկուսից հինգ տարի ժամկետով:

55. 375-րդ հոդվածի 2-րդ մասի համաձայն՝ վերոնշյալ արարքները, որոնք անզգուշությամբ նյութական ծանր հետեւանքներ են առաջացրել, պատժվում են ազատազրկմամբ՝ երեքից յոթ տարի ժամկետով՝ գույքի բռնագրավմամբ կամ առանց դրա:

II. ՔՐԵԱԿԱՆ ԴԱՏԱՎԱՐՈՒԹՅԱՆ ՕՐԵՆՍԳԻՐՔ

56. Նախկին Քրեական դատավարության օրենսգրքի համապատասխան դրույթները (ուժի մեջ՝ մինչեւ 2022 թվականի հուլիսի 1-ը) հետեւյալն էին.

57. 114-րդ հոդվածի 2-րդ մասի համաձայն՝ փորձագետը կարող էր հարցաքննվել իր տված եզրակացության պարզաբանման կապակցությամբ:

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

Փորձագետի հարցաքննության արձանագրությունը չէր կարող փոխարինել փորձագետի եզրակացությանը (114-րդ հոդվածի 3-րդ մաս):

58. 252-րդ հոդվածի 1-ին մասի համաձայն, եթե փորձագետի եզրակացությունը բավարար չափով պարզ չէր, ուներ բացեր, որոնք լրացնելու համար չէին պահանջվում լրացուցիչ հետազոտություններ կամ անհրաժեշտություն էր առաջանում ճշտելու փորձագետի կողմից կիրառված մեթոդները եւ հասկացությունները, քննիչն իրավունք ուներ հարցաքննելու փորձագետին՝ վկաներին հարցաքննելու համար կիրառվող կանոններին համապատասխան:

III. ՓՈԽՀԱՏՈՒՑՈՒՄ ՍՏԱՆԱԼՈՒ ԻՐԱՎՈՒՆՔԸ

59. Վնասի հատուցման մասով ներպետական իրավունքի՝ տվյալ ժամանակ գործող համապատասխան դրույթները շարադրված են *Միրզոյանն ընդդեմ Հայաստանի [Mirzoyan v. Armenia]* (թիվ 57129/10, §§ 46-50, 2019 թվականի մայիսի 23) գործում:

IV. «ՀՀ ԶԻՆՎԱԾ ՈՒԺԵՐԻ ՆԵՐՔԻՆ ԾԱՌԱՅՈՒԹՅԱՆ ԿԱՆՈՆԱԳԻՐՔԸ ՀԱՍՏԱՏԵԼՈՒ ՄԱՍԻՆ» ՀՀ ՕՐԵՆՔ

60. «ՀՀ զինված ուժերի ներքին ծառայության կանոնագիրքը հաստատելու մասին» ՀՀ օրենքը (Ներքին ծառայության կանոնագիրք), որն ընդունվել է 1996 թվականի դեկտեմբերի 3-ին, Հայաստանի զինված ուժերում զինվորական ծառայությունը կարգավորող հիմնական իրավական փաստաթուղթն է (տե՛ս նաեւ *Հովհաննիսյանը եւ Նազարյանն ընդդեմ Հայաստանի [Hovhannisyanyan and Nazaryan v. Armenia]* գործը, թիվ 2169/12 եւ թիվ 29887/14, § 86, 2022 թվականի նոյեմբերի 8):

61. Ներքին ծառայության կանոնագրքի 6-րդ հոդվածով նախատեսվում է, որ զինծառայողները գտնվում են պետության պաշտպանության տակ: Նրանց կյանքը, առողջությունը, պատիվն ու արժանապատվությունը պահպանվում են օրենքով: Ձինծառայողին անվանարկելը, սպառնալիքը, բռնությունը կամ ոտնձգությունը նրա կյանքի, առողջության, ունեցվածքի նկատմամբ եւ զինծառայողի վրա դրված պարտականությունների կատարմանը խոչընդոտող այլ գործողություններ, ինչպես նաեւ նրա իրավունքների ոտնահարումը առաջացնում են ՀՀ օրենսդրությամբ սահմանված պատասխանատվություն:

62. 11-րդ հոդվածով նախատեսվում է, որ զինծառայողները զինվորական ծառայության պարտականությունները կատարելիս, իսկ անհրաժեշտության դեպքում նաեւ ծառայությունից դուրս ունեն գենք պահելու, կրելու, գործադրելու եւ օգտագործելու իրավունք: Ձենքը պահելու, կրելու կանոնները եւ գործադրելու կարգը սահմանվում են սույն Ներքին ծառայության կանոնագրքով: Այնուհետեւ 11-րդ հոդվածում թվարկվում են այն հատուկ դեպքերը, երբ զինծառայողները որպես ծայրահեղ միջոց իրավունք ունեն գենք գործադրելու, այդ թվում՝ այլ զինծառայողների եւ քաղաքացիական անձանց կյանքին կամ առողջությանը սպառնացող հարձակումից պաշտպանելու համար:

63. 12-րդ հոդվածում նշվում է, ի թիվս այլնի, որ գենքի գործադրմանը պետք է նախորդի նախազգուշացում՝ բացառությամբ հատուկ դեպքերի (նույն հոդվածով սահմանված): Ձենք գործադրելու եւ օգտագործելու դեպքում զինծառայողը պարտավոր է ձեռնարկել բոլոր հնարավոր միջոցները՝ շրջապատի քաղաքացիների անվտանգության ապահովման համար, իսկ անհրաժեշտության դեպքում տուժածներին ցույց տալ անհետաձգելի բուժօգնություն:

V. ՊԱՇՏՊԱՆՈՒԹՅԱՆ ՆԱԽԱՐԱՐԻ՝ 2010 ԹՎԱԿԱՆԻ ՓԵՏՐՎԱՐԻ 26-Ի ԹԻՎ 175 ՀՐԱՄԱՆ (ՀՀ ՊԱՇՏՊԱՆՈՒԹՅԱՆ ՆԱԽԱՐԱՐԻ 2010 ԹՎԱԿԱՆԻ ՓԵՏՐՎԱՐԻ 26-Ի ԹԻՎ 175 ՀՐԱՄԱՆԸ ԶԻՆԱՊԱՐՏՆԵՐԻ ԲԺՇԿԱԿԱՆ ԵՎ ԶԻՆԾԱՌԱՅՈՂՆԵՐԻ ՌԱԶՄԱԲԺՇԿԱԿԱՆ ՓՈՐՁԱՔՆՆՈՒԹՅԱՆ ԿԱՐԳԸ ՀԱՍՏԱՏԵԼՈՒ ՄԱՍԻՆ)

64. Սույն հրամանը, որը դադարել է գործել 2013 թվականի հունիսի 11-ից, սահմանում էր, *inter alia*, պարտադիր զինվորական ծառայության զորակոչվող անձանց՝ զինվորական ծառայության համար նրանց պիտանիությունը որոշելու նպատակով բժշկական փորձաքննության կարգը: Դրանում, ի թիվս այլ հարցերի, նշվում էր, որ համապատասխան փորձաքննությունները բժշկական եւ ռազմաբժշկական հանձնաժողովների կողմից պետք է իրականացվեին հրամանի հավելվածներին համապատասխան (2-րդ կետ): Զորակոչիկների վերաբերյալ Կենտրոնական բժշկական հանձնաժողովի որոշումները վերջնական էին (29-րդ կետ): Կենտրոնական ռազմաբժշկական հանձնաժողովի գործառույթները, ի թիվս այլ հարցերի, ներառում էին ենթակա փորձաքննության մարմինների եզրակացությունները հաստատելու կամ մերժելու վերաբերյալ որոշում կայացնելը, ինչպես նաեւ անհրաժեշտության դեպքում՝ զինծառայողների եւ զորակոչի ենթակա անձանց փորձաքննության վերաբերյալ որոշումներ ընդունելը:

65. Այդ հրամանի թիվ 1 հավելվածով սահմանվում էր հիվանդությունների եւ ֆիզիկական թերությունների ընդարձակ ցանկ՝ համապատասխան բժշկական եւ ռազմաբժշկական հանձնաժողովների կողմից կայացվող համապատասխան որոշումներով: Թիվ 1 հավելվածի 17-րդ կետի «բ» ենթակետում նշվում էր, որ ֆիզիկական թերզարգացման դեպքում, եթե անհատի քաշը 45 կգ-ից ավելի է եւ հասակը 150 սմ-ից բարձր է, նա պիտանի է զինվորական ծառայության: Նշված հրամանի թիվ 1 հավելվածի 26-րդ կետը վերաբերում էր սրտին եւ սրտի հետ կապված տարբեր հիվանդություններին: 26-րդ կետի «դ» ենթակետի համաձայն՝ այն անձինք, որոնք ունեին այնպիսի վիճակ, որը չէր առաջացնում հեմոդինամիկայի (արյան շրջանառության) խանգարումներ, պիտանի էին ոչ շարային ծառայության:

ԻՐԱՎՈՒՆՔԸ

I. ԿՈՆՎԵՆՏԻԱՅԻ 2-ՐԴ ՀՈՂՎԱԾԻ ԵՆԹԱԴԻՐՅԱԼ ԽԱԽՏՈՒՄԸ

66. Դիմումատուն բողոք է ներկայացրել պարտադիր զինվորական ծառայության ընթացքում իր որդու մահվան կապակցությամբ եւ պնդել, որ մարմիններն այդ հարցի առնչությամբ արդյունավետ քննություն չեն իրականացրել: Նա հիմնվել է Կոնվենցիայի 2-րդ հոդվածի վրա, որի համապատասխան մասն ունի հետեւյալ բովանդակությունը.

«1. Յուրաքանչյուրի կյանքի իրավունքը պաշտպանվում է օրենքով»:

Ա. Ընդունելիությունը

1. Իրավագորությունը

67. Կառավարությունը պնդել է, որ Հայաստանի իրավագորությունը պետք է ընդունվեր «պետական իշխանական գործառույթների եւ վերահսկողության» բացառման հիմքով, քանի որ բողոքարկվող բոլոր ակտերը վերագրվել են Հայաստանի իշխանություններին: Մասնավորապես Տ.Վարյանի մահվան հանգամանքների, ինչպես նաեւ դրան հաջորդած դատական գործի քննությունն իրականացրել են Հայաստանի Հանրապետության իշխանությունները:

68. Դիմումատուն պնդել է, որ բողոքարկվող հարցերը Հայաստանի իրավագորության շրջանակներում էին:

69. Դատարանը նշում է, որ նախկինում քննել է Հայաստանի իրավագորության հարցը Լեռնային Ղարաբաղում զինվորական ծառայության ընթացքում մահվան դեպքերով այլ գործերով եւ գտել, որ Կոնվենցիայի 1-ին հոդվածի նպատակներով Հայաստանի եւ նշված տարածքում զինվորական ծառայություն իրականացնող անձանց միջեւ իրավագորության առումով կապ կա (տե՛ս *Մուրադյանն ընդդեմ Հայաստանի [Muradyan v. Armenia] գործը, թիվ*

11275/07, § 123-127, 2016 թվականի նոյեմբերի 24, Նանա Մուրադյանն ընդդեմ Հայաստանի [Nana Muradyan v. Armenia] գործը, թիվ 69517/11, §§ 86-92, 2022 թվականի ապրիլի 5, Դիմաքսյանն ընդդեմ Հայաստանի [Dimaksyan v. Armenia] գործը, թիվ 29906/14, §§ 43 եւ 44, 2023 թվականի հոկտեմբերի 17, Հովհաննիսյանն ու Կարապետյանն ընդդեմ Հայաստանի [Hovhannisyanyan and Karapetyan v. Armenia] գործը, թիվ 67351/13, §§ 59-63, 2023 թվականի հոկտեմբերի 17, որոնք վերաբերում են Լեռնային Ղարաբաղում պարտադիր զինվորական ծառայության ժամանակ զորակոչիկների մահվան դեպքերին, եւ համեմատի՛ր Միրզոյանն ընդդեմ Հայաստանի [Mirzoyan v. Armenia] գործի հետ, թիվ 57129/10, §§ 55-56, 2019 թվականի մայիսի 23, որը վերաբերում է Լեռնային Ղարաբաղում պարտադիր զինվորական ծառայության ընթացքում զորակոչիկի սպանությանը):

70. Դիմումատուի որդին մահացել է 2012 թվականի փետրվարի 29-ին «ԼՂՀ»-ում գտնվող զորամասում (տե՛ս վերելում՝ 7-րդ եւ 8-րդ պարբերությունները): Դատարանը նշում է, որ գործի փաստերը տեղի են ունեցել նախքան Լեռնային Ղարաբաղի պատերազմի հետեւանքով երկրում տիրող իրավիճակի փոփոխությունը, որն ավարտվել է 2020 թվականի նոյեմբերի 10-ին, երբ Ադրբեջանը գրավել է հարակից բոլոր տարածքները եւ «ԼՂՀ»-ի մի մասը, եւ երբ ռուս խաղաղապահները տեղակայվել են տարածքում (տե՛ս վերելում նշված Նանա Մուրադյանի գործը, § 91) եւ 2023 թվականի սեպտեմբերին երկրում տիրող իրավիճակի հետագա փոփոխությամբ՝ պայմանավորված Լեռնային Ղարաբաղի իննամսյա շրջափակմամբ, Ադրբեջանի հետագա գործողություններով եւ Լեռնային Ղարաբաղի հայ բնակչության արտագաղթով: Հետեւաբար Դատարանը սույն գործում չի գտնում որեւէ առանձնահատուկ հանգամանք, որն իրեն կստիպեր շեղվել վերելում՝ 69-րդ պարբերությունում նշված գործերով իր կայացրած եզրակացություններից: Հետեւաբար Դատարանը գտնում է, որ սույն գործով Կոնվենցիայի 1-ին հոդվածի նպատակների համար իրավազորության կապ է եղել Հայաստանի եւ դիմումատուի մահացած որդու միջեւ այն հիմքով, որ

նշված ժամանակահատվածում Հայաստանն արդյունավետ վերահսկողություն է իրականացրել Լեռնային Ղարաբաղի եւ հարակից տարածքների նկատմամբ (տե՛ս, օրինակ, Դիմաքայանի գործը, § 44, եւ Հովհաննիսյանի ու Կարապետյանի գործը, § 62, որոնք երկուսն էլ նշված են վերելում):

2. *Ներպետական իրավական պաշտպանության միջոցները չսպառելը եւ վեցամսյա ժամկետի կանոնը չպահպանելը*

71. Ի պատասխան դիմումատուի դիտարկումների՝ 2017 թվականի հոկտեմբերի 11-ի իր հետագա դիտարկումներում Կառավարությունը պնդել է, որ նա չի սպառել Կոնվենցիայի 2-րդ եւ 3-րդ հոդվածներով իր բողոքների մասով պաշտպանության ներպետական միջոցները: Մասնավորապես Կառավարությունը պնդել է, որ դիմումատուն չի ներկայացրել ոչ նյութական վնասի հատուցման քաղաքացիական հայց, եւ եթե նա համարեր, որ դա արդյունավետ պաշտպանության միջոց չէ, ապա պետք է իր դիմումը ներկայացներ ծառայողական քննության արդյունքների հրապարակման օրվանից վեց ամսվա ընթացքում: Այդ կապակցությամբ Կառավարությունը պնդել է, որ վեցամսյա ժամկետի հաշվարկման մեկնարկային կետը պետք է լինի 2012 թվականի մարտի 13-ը (տե՛ս վերելում՝ 41-րդ պարբերությունը):

72. Դատարանը նշում է, որ Դատարանի Կանոնակարգի 55-րդ կանոնի համաձայն, անընդունելիության վերաբերյալ ցանկացած միջնորդություն պետք է արվի պատասխանող Պայմանավորվող կողմի կողմից, այնքանով, որքանով առարկության բնույթն ու հանգամանքները դա թույլ են տալիս, գանգատի ընդունելիության վերաբերյալ իր գրավոր կամ բանավոր դիտարկումներում: Կառավարության կողմից գործի ընդունելիության վերաբերյալ իր նախնական դիտարկումներում այդպիսի առարկություններ ներկայացնելու մասով ցանկացած բացթողում կարող է հանգեցնել նրան, որ Դատարանը կարող է եզրակացնել, որ Կառավարությունը զրկվել է այդ առարկությունները վարույթի ավելի ուշ փուլում

ներկայացնելու հնարավորությունից (տե՛ս *Խլաիֆիան եւ այլք ընդդեմ Իտալիայի* [ՄՊ] [*Khlaifia and Others v. Italy* [GC]] գործը, թիվ 16483/12, §§ 51-54, 2016 թվականի դեկտեմբերի 15):

73. Այս գանգատի ընդունելիության եւ ըստ էության քննության վերաբերյալ 2017 թվականի ապրիլի 11-ի իր դիտարկումներում Կառավարությունն առարկություն է ներկայացրել Կոնվենցիայի 13-րդ հոդվածի համաձայն դիմումատուի բողոքի առնչությամբ ներպետական իրավական պաշտպանության միջոցները չսպառելու վերաբերյալ (տե՛ս ստորեւ՝ 138-րդ պարբերությունը), մինչդեռ Դիմումատուի կողմից Կոնվենցիայի 2-րդ եւ 3-րդ հոդվածներով նախատեսված՝ իր բողոքների մասով ներպետական իրավական պաշտպանության միջոցները չսպառելու եւ վեցամսյա ժամկետը չպահպանելու հարցն առաջին անգամ բարձրաձայնվել է 2017 թվականի հոկտեմբերի 11-ի՝ Կառավարության հետագա դիտարկումներում, որոնք ներկայացվել են ի պատասխան դիմումատուի դիտարկումների (տե՛ս վերելում՝ 71-րդ պարբերությունը):

74. Դատարանը նշում է, որ Կառավարությունը նախկինում այդպիսի առարկություններ է ներկայացրել բանակում մահվան դեպքերի վերաբերյալ այլ գործերով (տե՛ս, օրինակ, վերելում հիշատակված՝ Նանա Մուրադյանի գործը, § 101, Հովհաննիսյանն ու Նազարյանն ընդդեմ Հայաստանի գործը, թիվ 2169/12 եւ թիվ 29887/14, § 92, 2022 թվականի նոյեմբերի 8, եւ վերելում հիշատակված՝ Հովհաննիսյանի եւ Կարապետյանի գործը, § 64): Այնուամենայնիվ, Կառավարությունը չի բացատրել, թե ինչու սույն գործով իր առարկությունները չեն բարձրացվել գանգատի ընդունելիության վերաբերյալ իր առաջին գրավոր դիտարկումներում, եւ որեւէ բացատրություն չի տրվել առարկությունները բարձրացնելու հարցն ուշացնելու համար: Դատարանը չի գտնում որեւէ բացառիկ հանգամանք, որը կարող է Կառավարությանն ազատել ընդունելիության վերաբերյալ ժամանակին առարկություն ներկայացնելու իր պարտականությունից:

75. Դատարանը վերահաստատում է, որ այն դեպքում, երբ պատասխանող կառավարությունը գործի մասին ծանուցվել է, իր ընդունված գործելակերպն այն է, որ գանգատն անընդունելի չի հայտարարվում ներպետական իրավական պաշտպանության միջոցները չսպառելու համար, քանի դեռ Կառավարությունն իր դիտարկումներում չի բարձրացրել այդ հարցը (տե՛ս Յ.-ն ընդդեմ Լատվիայի [Y v. Latvia] գործը, թիվ 61183/08, § 40, 2014 թվականի հոկտեմբերի 21, հետագա հղումների հետ միասին): Հաշվի առնելով այն փաստը, որ Կառավարությունը ժամանակին չի ներկայացրել իր նախնական առարկությունները (տե՛ս վերելում՝ 74-րդ պարբերությունը), նա զրկվել է առարկություն ներկայացնելու հնարավորությունից այն մասին, որ դիմումատուն չի սպառել Կոնվենցիայի 2-րդ եւ 3-րդ հոդվածներով նախատեսված՝ բողոքների առնչությամբ ներպետական իրավական պաշտպանության միջոցները (տե՛ս, համապատասխան փոփոխություններով՝ Ստանեն ընդդեմ Բուլղարիայի [ՄՊ] [Stanev v. Bulgaria [GC]] գործը, թիվ 36760/06, §§ 195-196, ՄԻԵԴ 2012թ., եւ վերելում հիշատակված՝ *Խլաիֆիան եւ այլք ընդդեմ Իտալիայի* գործը, §§ 53-54): Հետեւաբար Կառավարության առարկությունը պետք է մերժվի: Մյուս կողմից՝ թեեւ Կառավարությունը վեցամսյա ժամկետի կիրառման մասով առարկություն չի ներկայացրել սույն գործի ընդունելիության եւ ըստ էության քննության վերաբերյալ դիտարկումների առաջին փուլում (տե՛ս վերելում՝ 73-րդ պարբերությունը), Դատարանը կարող է եւ իրականում նույնիսկ իր նախաձեռնությամբ պետք է կիրառի Կոնվենցիայի 35-րդ հոդվածի 1-ին կետով սահմանված վեցամսյա ժամկետի կանոնը, քանի որ դա հանրային քաղաքականություն է (տե՛ս, համապատասխան փոփոխություններով՝ Մերաբիշվիլին ընդդեմ Վրաստանի [ՄՊ] [Merabishvili v. Georgia [GC]] գործը, թիվ 72508/13, § 247, 2017 թվականի նոյեմբերի 28՝ հետագա հղումներով): Ասվածը հաշվի առնելով եւ այնքանով, որքանով Կառավարությունը պնդել է, որ Կոնվենցիայի 2-րդ եւ 3-րդ հոդվածների համաձայն՝ դիմումատուի բողոքների առնչությամբ վեցամսյա ժամկետը պետք է հաշվարկվեր 2012 թվականի մարտի 13-ից՝ այն օրվանից, երբ Պաշտպանության նախարարի հրամանն ընդունվել էր՝

Խնդրո առարկա միջադեպի վերաբերյալ ծառայողական քննության արդյունքում կարգապահական տույժեր կիրառելով՝ (տե՛ս վերելում՝ 41-րդ պարբերությունը)՝ Դատարանը նկատում է, որ այն վերջերս ուսումնասիրել է, թե արդյոք Պաշտպանության նախարարի կողմից տրված այդպիսի հրամանները կարող են բանակում մահվան ելքով դեպքերի մասով համարվել որպես «վերջնական որոշում»՝ Կոնվենցիայի 35-րդ հոդվածի 1-ին կետի իմաստով, եւ եզրակացրել է, որ դրանք չեն կարող համարվել վերջնական (տե՛ս Աշոտ Մալխասյանն ընդդեմ Հայաստանի [Ashot Malkhasyan v. Armenia] գործը, թիվ 35814/14, §§ 69-71, 2022 թվականի հոկտեմբերի 11, վերելում հիշատակված՝ Հովհաննիսյանի եւ Նազարյանի գործը, §§ 95-99, եւ Հովհաննիսյանի եւ Կարապետյանի գործը, § 67): Դատարանն այս գործում այդ եզրահանգումից շեղվելու որեւէ պատճառ չի տեսնում: Ավելին, այն հիմքեր չունի համարելու, որ Ս. Վարյանի մահվան հանգամանքների վերաբերյալ քրեական վարույթը եղել է անարդյունավետ պաշտպանության միջոց՝ Կոնվենցիայի 2-րդ եւ 3-րդ հոդվածներով նախատեսված՝ դիմումատուի բողոքների մասով: Դատարանն այս կապակցությամբ նկատում է, որ այդ վարույթով վերջնական որոշումը կայացվել է Վճռաբեկ դատարանի կողմից 2013 թվականի դեկտեմբերի 27-ին (տե՛ս վերելում՝ 49-րդ պարբերությունը), եւ որ դիմումատուն իր բողոքը ներկայացրել է 2014 թվականի հունիսի 27-ին, այսինքն՝ վեցամսյա ժամկետի պահանջի պահպանմամբ: Ուստի Դատարանը համարում է, որ գանգատը ժամկետից ուշ չի ներկայացվել:

3. Անընդունելիության այլ հիմքեր

76. Դատարանը նշում է, որ սույն բողոքը ո՛չ ակնհայտ անհիմն է, ո՛չ էլ անընդունելի Կոնվենցիայի 35-րդ հոդվածում նշված որեւէ այլ հիմքով: Հետեւաբար այն պետք է հայտարարվի ընդունելի:

Բ. Ըստ էության քննությունը

1. Կողմերի փաստարկները

ա) Դիմումատուն

77. Դիմումատուն պնդել է, որ իր որդին ինքնասպանություն է գործել պետական իշխանության մարմինների բացառիկ հսկողության ներքո պարտադիր զինվորական ծառայություն իրականացնելիս, որոնք, ըստ նրա պնդման, չեն պաշտպանել նրա կյանքի իրավունքը՝ խախտելով Կոնվենցիայի 2-րդ հոդվածը:

78. Դիմումատուն նաեւ պնդել է, որ իր որդու նկատմամբ շարունակաբար ցուցաբերվել է ֆիզիկական եւ հոգեբանական բնույթի վատ վերաբերմունք, որի հետեւանքով նա ինքնասպանություն է գործել: Ավելին, զորամասում կարգապահություն չի եղել, որի հետեւանքով պատշաճ ձեւով չի կազմակերպվել զինվորական պարտականությունների կատարումը եւ ստեղծվել է այնպիսի անառողջ միջավայր, որ թե՛ ծառայակիցները եւ թե՛ վերադաս սպաները օգտվել են Տ. Վարյանին պարբերաբար ծաղրելու եւ նվաստացնելու հնարավորությունից: Բացի այդ, չնայած դիմումատուի որդին ճանաչվել է միայն ոչ մարտական ծառայության համար պիտանի (տե՛ս վերելում՝ 6-րդ պարբերությունը), նա իրականացրել է հերթապահություն մարտական հենակետում, հաճախ՝ իր ծառայակիցների փոխարեն, եւ պարտադրաբար կատարել է ծանր ֆիզիկական աշխատանք: Արդյունքում իր որդին ենթարկվել է ծանր ֆիզիկական եւ հոգեբանական ճնշման, որն էլ կարող էր լինել նրա՝ հերթապահության ժամանակ քուն մտնելու պատճառ: Դա եղել է եւս մեկ պատրվակ նրա նկատմամբ վատ վերաբերմունք ցուցաբերելու համար:

79. Ինչ վերաբերում է գործի քննությանը, ապա դիմումատուն պնդել է, որ քննությամբ չեն պարզվել նրա որդու մահվան իրական հանգամանքները եւ չեն բացահայտվել բոլոր պատասխանատուները: Առաջադրված միակ վարկածը եղել է ինքնասպանությունը: Անտեսվել են մի շարք կարեւոր կետեր, այդ թվում՝ այն փաստը, որ չնայած միայն ոչ մարտական ծառայության համար պիտանի

ճանաչված լինելուն՝ Ս. Վարյանին հանձնարարվել է ծանր ֆիզիկական աշխատանք: Արդյունքում այն անձինք, որոնք ներգրավվել են նրան այդ աշխատանքներում, չեն բացահայտվել եւ պատասխանատվության չեն ենթարկվել:

բ) Կառավարությունը

80. Կառավարությունը պնդել է, որ ինչպես հաստատել են քննության ընթացքում հարցաքննված բոլոր վկաները, Ս. Վարյանը երբեք չի խոսել ինքնասպանություն գործելու մասին եւ երբեք չի դրսեւորել անհանգստացնող նշաններ (տե՛ս վերելում՝ 15-րդ պարբերությունը): Նրանք հղում են կատարել Ս. Վարյանի՝ զորակոչի ժամանակ իրականացված բժշկական զննություններին, որոնք ի հայտ չեն բերել որեւէ հոգեբանական խնդիր, ինչպես նաեւ նրա զինվորական ծառայության ընթացքում կազմված անձնական հատկանիշների մասին անձնական բնութագրերին, որտեղ Ս. Վարյանը նկարագրվել է որպես բարեխիղճ եւ պատասխանատու ծառայող, որը չի ունեցել վատ սովորություններ:

81. Թեեւ ենթադրաբար Ս. Վարյանի ինքնասպանության պատճառ են դարձել ավագ լեյտենանտ Հ.Հ.-ի եւ կրտսեր սերժանտ Է.Ս.-ի եւ Գ.Մ.-ի գործողությունները, ինքնասպանություն գործելու որոշումը կայացվել է արագ եւ ակնթարթորեն, հետեւաբար զորամասի հրամանատարական կազմը չգիտեր եւ չէր կարող իմանալ այդ ռիսկի մասին:

82. Վկայակոչելով նախկին Քրեական օրենսգրքի 359-րդ հոդվածի 1-ին մասը եւ 375-րդ հոդվածի 1-ին մասը (տե՛ս վերելում՝ 52-րդ եւ 54-րդ պարբերությունները) եւ Ներքին ծառայության կանոնագրքի 6-րդ հոդվածը (տե՛ս վերելում՝ 61-րդ պարբերությունը)՝ Կառավարությունը պնդել է, որ համապատասխան ներպետական կարգավորումներով նախատեսված է արդյունավետ իրավակիրառ մեխանիզմ՝ կյանքի իրավունքի խախտումները կանխելու, նախականիելու եւ պատժելու համար, ինչպես նաեւ կանխարգելիչ եւ

պատժիչ միջոցառումներ՝ զինճառայողի անվտանգությունը եւ պաշտպանությունն ապահովելու համար:

83. Անդրադառնալով գործի քննությանը՝ Կառավարությունը պնդել է, որ դրա ընթացքը եղել է արագ, անկախ, պատշաճ եւ տուժող կողմին հասանելի:

84. Ինչ վերաբերում է մասնավորապես քննության պատշաճ ընթացքին, Կառավարությունը հղում է կատարել վկաների մեծաթիվ հարցաքննություններին (տե՛ս, օրինակ, վերելում՝ 13-18-րդ, 20-22-րդ եւ 26-րդ պարբերությունները) եւ մի քանի առերեսումներին, որոնք իրականացվել են մեղադրյալների (ավագ լեյտենանտ Հ.Հ. եւ կրտսեր սերժանտներ Է.Ս. եւ Գ.Մ.) եւ հիմնական վկա շարքային Ռ.Ա.-ի ցուցմունքներում առկա անհամապատասխանությունների վրա լույս սփռելու նպատակով (տե՛ս վերելում՝ 23-25-րդ պարբերությունները), ինչպես նաեւ իրականացված բազմաթիվ դատաբժշկական փորձաքննություններին (տե՛ս, օրինակ, վերելում՝ 19-րդ, 32-րդ եւ 37-րդ պարբերությունները):

85. Ինչ վերաբերում է մասնավորապես Տ. Վարյանի մարմնի վրա հայտնաբերված ոչ հրազենային վնասվածքներին, ապա Կառավարությունը ներկայացրել է դիախերճումն իրականացրած դատաբժշկական փորձագետի այն հարցաքննության արձանագրությունը (տե՛ս վերելում՝ 36-րդ պարբերությունը), որի ընթացքում նա նշել է, որ դիախերճման արձանագրության մեջ նկարագրված ոչ հրազենային վնասվածքները պատճառվել են հրազենը քթին եւ գանգի հիմքին պահելու հետեւանքով:

86. Ի վերջո, ինչ վերաբերում է դատաբժշկական եւ դատաձգաբանական փորձաքննությանը, որի շրջանակներում պարզվել է, որ Տ. Վարյանի հրազենային վնասվածքը կարող էր հասցված լինել իր իսկ կողմից կամ մեկ այլ անձի կողմից (տե՛ս վերելում՝ 34-րդ պարբերությունը), ապա Կառավարությունը պնդել է, որ հիմք ընդունելով հավաքված բոլոր ապացույցների համակցությունը՝ քննությամբ հաստատվել է, որ Տ. Վարյանը կատարել է ինքնասպանություն: Հաշվի առնելով հրազենային վնասվածքի տեղակայվածությունը եւ այն փաստը, որ մարմնի վրա

չեն հայտնաբերվել այլ վնասվածքներ, Կառավարությունը միանգամայն անհավանական է համարել, որ որեւէ մեկը կարող էր Տ. Վարյանին կրակել այդքան մոտ տարածությունից՝ առանց նրա կողմից դրսեւորվող որեւէ դիմադրության:

2. *Դատարանի գնահատականը*

ա) Ընդհանուր սկզբունքները

i) Նյութաիրավական հայեցակետը

87. Դատարանը վերահաստատում է, որ 2-րդ հոդվածը, որով պաշտպանվում է կյանքի իրավունքը, համարվում է Կոնվենցիայի ամենահիմնարար դրույթներից մեկը: 3-րդ հոդվածի հետ միասին այն եւս սահմանում է Եվրոպայի խորհրդի ժողովրդավարական հասարակությունների հիմնարար արժեքներից մեկը: Կոնվենցիայի՝ որպես անձի պաշտպանության փաստաթղթի խնդիրներից եւ նպատակից ելնելով՝ անհրաժեշտ է 2-րդ հոդվածը մեկնաբանել եւ կիրառել այնպես, որ դրանում սահմանված երաշխիքները լինեն գործուն ու արդյունավետ (տե՛ս, ի թիվս այլ վճիռների, ՄըքՔենը եւ այլք ընդդեմ Միացյալ Թագավորության [McCann and Others v. the United Kingdom], 1995 թվականի սեպտեմբերի 27, §§ 146-147, շարք Ա, թիվ 324):

88. 2-րդ հոդվածի 1-ին կետի առաջին նախադասությամբ պետության համար սահմանվում է ոչ միայն անձին դիտավորությամբ եւ ապօրինաբար կյանքից զրկելուց զերծ մնալու, այլ նաեւ իր իրավազորության շրջանակներում գտնվող անձանց կյանքը պաշտպանելու նպատակով համապատասխան միջոցառումներ ձեռնարկելու պարտավորություն (տե՛ս Էլ.Սի.Բի.-ն ընդդեմ Միացյալ Թագավորության [L.C.B. v. the United Kingdom], 1998 թվականի հունիսի 9, § 36, Վճիռների եւ որոշումների մասին զեկույցներ 1998-III): Այնուամենայնիվ, դրական պարտավորությունը պետք է մեկնաբանվի այնպես, որ

իշխանությունների վրա չափից ավելի մեծ բեռ չդրվի, մասնավորապես՝ հաշվի առնելով մարդկային վարքի անկանխատեսելի բնույթը (տե՛ս Քինանն ընդդեմ Միացյալ Թագավորության [Keenan v. the United Kingdom], թիվ 27229/95, §§ 89-90, ՄԻԵԴ 2001-III):

89. Պարտադիր զինվորական ծառայություն անցնող անձանց համատեքստում Դատարանը նախկինում առիթ է ունեցել նշելու, որ ինչպես կալանքի տակ պահվող անձանց դեպքում, ժամկետային զինծառայողները նույնպես գտնվում են պետական իշխանությունների բացառիկ հսկողության ներքո, քանի որ բացառապես պետական իշխանություններն են ամբողջությամբ կամ մեծ մասամբ տեղյակ բանակում տեղի ունեցող դեպքերից, եւ վերջիններիս վրա է դրված նրանց պաշտպանելու պարտականությունը (տե՛ս Բեքերն ընդդեմ Թուրքիայի [Beker v. Turkey], թիվ 27866/03, §§ 41-42, 2009 թվականի մարտի 24, Մոսենձն ընդդեմ Ուկրաինայի [Mosendz v. Ukraine], թիվ 52013/08, § 92, 2013 թվականի հունվարի 17, Մալիկ Բաբայեւն ընդդեմ Ադրբեջանի [Malik Babayev v. Azerbaijan], թիվ 30500/11, § 66, 2017 թվականի հունիսի 1, վերելում հիշատակված՝ Նանա Մուրադյանի գործը, § 120, եւ վերելում հիշատակված՝ Հովհաննիսյանի եւ Նազարյանի գործը, § 117, հաջորդող հղումների հետ միասին):

90. Նույն համատեքստում Դատարանի կողմից հետագայում կայացված վճիռներում այն նշել է, որ պետության առաջնային պարտականությունն է ներդնել կյանքին կամ ֆիզիկական անձեռնմխելիությանը սպառնացող այն վտանգի աստիճանին հարմարեցված կանոններ, որը կարող է առաջանալ՝ պայմանավորված ոչ միայն ռազմական գործողությունների եւ օպերացիաների բնույթով, այլեւ մարդկային գործոնով, որն առաջ է գալիս այն ժամանակ, երբ պետությունը որոշում է սովորական քաղաքացիներին զորակոչել զինվորական ծառայության: Այդպիսի կանոններով պետք է պահանջվի ձեռնարկել գործնական միջոցներ, որոնք ուղղված են ժամկետային զինծառայողներին զինվորական կյանքին ներհատուկ վտանգներից արդյունավետորեն պաշտպանելուն, եւ պատշաճ ընթացակարգեր այն թերությունները եւ սխալները հայտնաբերելու

համար, որոնք այդ առնչությամբ կարող են առաջանալ տարբեր մակարդակներում պատասխանատուների կողմից (տե՛ս Կիլինչը եւ այլք ընդդեմ Թուրքիայի [Kilinç and Others v. Turkey], թիվ 40145/98, § 41, 2005 թվականի հունիսի 7, եւ վերելում հիշատակված՝ Մոսենձի գործը, § 91):

91. Ավելին, պետություններից պահանջվում է պայմանագրային զինճառայողների շրջանում ապահովել բարձր մասնագիտական չափանիշներ, որոնց գործողությունները եւ անգործությունը, մասնավորապես՝ պայմանագրային զինճառայողների նկատմամբ, կարող են որոշակի հանգամանքներում առաջ բերել պետության պատասխանատվությունը, *inter alia*, 2-րդ հոդվածի նյութաիրավական հայեցակետով (տե՛ս, մասնավորապես, Աբդուլլահ Յիլմազն ընդդեմ Թուրքիայի [Abdullah Yilmaz v. Turkey], թիվ 21899/02, §§ 56-57, 2008 թվականի հունիսի 17, եւ վերելում հիշատակված՝ Նանա Մուրադյանի գործը, § 122, տե՛ս նաեւ, *mutatis mutandis* (համապատասխան փոփոխություններով), Ստոյանովին ընդդեմ Բուլղարիայի [Stoyanovi v. Bulgaria], թիվ 42980/04, § 61, 2010 թվականի նոյեմբերի 9):

92. Այս առնչությամբ հարկ է նշել, որ կյանքին սպառնացող ոչ բոլոր պնդվող ռիսկերի դեպքում կարող է ենթադրվել իշխանությունների կողմից Կոնվենցիայի՝ այդ ռիսկի նյութականացումը կանխելու համար անհապաղ միջոցներ ձեռնարկելու պահանջի կատարում: Դատարանը պետք է քննի, թե արդյոք իշխանություններն այդ ժամանակ գիտեին կամ պետք է իմանային կոնկրետ անձի կյանքին սպառնացող իրական եւ անմիջական վտանգի առկայության մասին, եւ եթե այո, արդյո՞ք նրանք չեն ձեռնարկել միջոցներ իրենց լիազորությունների շրջանակում, ինչը ողջամտության տեսանկյունից կարող էր ակնկալվել այդ վտանգից խուսափելու համար (տե՛ս վերելում հիշատակված՝ Քինանի գործը, §§ 89 եւ 93, Սահինկուսուն ընդդեմ Թուրքիայի [Şahinkuşu v. Turkey], թիվ 38287/06, § 58, 2016 թվականի հունիսի 21, եւ Կուրտն ընդդեմ Ավստրիայի [Kurt v. Austria [GC]], թիվ 62903/15, § 158, 2021 թվականի հունիսի 15):

93. Ինչ վերաբերում է մասնավորապես ինքնասպանության ռիսկերին, ապա Դատարանը նախկինում հաշվի է առել մի շարք գործոններ՝ պարզելու համար, թե արդյոք իշխանությունները գիտեին կամ պետք է իմանային, որ կոնկրետ անձի կյանքին սպառնում էր իրական եւ անմիջական վտանգ՝ առաջացնելով համապատասխան կանխարգելիչ միջոցներ ձեռնարկելու պարտականությունը: Այս գործոնները սովորաբար ներառում են հոգեկան առողջության հետ կապված խնդիրների պատմությունը, հոգեկան վիճակի ծանրությունը, ինքնասպանության կամ ինքնավնասման նախկին փորձերը, ինքնասպանության մտքերը կամ սպառնալիքները եւ ֆիզիկական կամ հոգեկան խանգարման նշանները (Ֆերնանդես դե Օլիվեյրան ընդդեմ Պորտուգալիայի [ՄՊ] [Fernandes de Oliveira v. Portugal [GC]], թիվ 78103/14, § 115, 2019 թվականի հունվարի 31, եւ դրանում արված հղումները): Վերոհիշյալ Ֆերնանդես դե Օլիվեյրայի գործով հաստատված սկզբունքները, որոնք վերաբերում էին պետական հոգեբուժարանում ստացիոնար բուժում անցնող հոգեկան հիվանդություն ունեցող անձի ինքնասպանությանը, հավասարապես կիրառվում են կալանքի տակ գտնվող անձանց, ինչպես նաեւ ժամկետային զինծառայողների նկատմամբ (տե՛ս Բոյչենկոն ընդդեմ Ռուսաստանի [Boychenko v. Russia], թիվ 8663/08, § 80, 2021 թվականի հոկտեմբերի 12, հաջորդող հղումների հետ միասին, եւ վերելում հիշատակված՝ Հովհաննիսյանի եւ Նազարյանի գործը, § 121):

94. Համաձայն Դատարանի նախադեպային իրավունքի՝ պետությունը պատասխանատվություն է կրում այն տուժողների մահվան համար, որոնց ինքնասպանության են դրդել նրանց զինվորական ղեկավարները՝ ծաղրուծանակի ենթարկելով եւ վատ վերաբերմունք ցուցաբերելով (տե՛ս վերելում հիշատակված՝ Բոյչենկոյի գործը, § 80, եւ վերելում հիշատակված՝ Հովհաննիսյանի եւ Նազարյանի գործը, § 122):

95. Ի վերջո, ապացույցները գնահատելիս Դատարանը կիրառում է «ողջամիտ կասկածից վեր» ապացուցողական չափանիշը: Այնուամենայնիվ,

այդպիսի ապացույցը կարող է բխել բավականաչափ հիմնավորված, պարզ եւ համահունչ եզրահանգումների համաժամանակյա առկայությունից կամ նմանատիպ անհերքելի փաստերի կանխավարկածից: Այն դեպքերում, երբ խնդրահարույց իրադարձություններն ամբողջությամբ կամ մեծ մասամբ գտնվում են պետական իշխանության մարմինների իմացության տիրույթում, ինչպես օրինակ՝ իրենց վերահսկողության ներքո կալանքի տակ կամ բանակում գտնվող անձանց դեպքում, կալանավորման կամ ծառայության ընթացքում առաջացած վնասվածքների եւ մահվան հետ կապված՝ ի հայտ կգան փաստերի մասին լուրջ կանխավարկածներ: Եվ բնականաբար, բավարար եւ համոզիչ բացատրություն տրամադրելու ապացուցման բեռը կարող է դիտվել որպես պետական իշխանության մարմինների պարտականություն (տե՛ս, ի թիվս շատ այլ վճիռների, Անգուելովան ընդդեմ Բուլղարիայի [Anguelova v. Bulgaria], թիվ 38361/97, §§ 109-111, ՄԻԵԴ 2002-IV, վերելում հիշատակված՝ Նանա Մուրադյանի գործը, § 123):

ii) Դատավարական հայեցակետեր

96. Կյանքի իրավունքը պաշտպանելու, ինչպես նաեւ դրանից զրկվելու դեպքի վերաբերյալ պատշաճ տեղեկություններ ներկայացնելու պարտավորության համար անուղղակիորեն պահանջվում է որոշակի արդյունավետ պաշտոնական քննության իրականացում, եթե հիմք կա կարծելու, որ անձին կասկածելի հանգամանքներում հասցվել են կյանքին սպառնացող վնասվածքներ, նույնիսկ այն դեպքում, երբ մահ առաջացրած ոտնձգությունը կատարելու մեջ կասկածվող անձը պետական պաշտոնյա չէ (տե՛ս Մուսթաֆա Թունջը եւ Ֆեջիրե Թունջն ընդդեմ Թուրքիայի [ՄՊ] [Mustafa Tunç and Fecire Tunç v. Turkey [GC]] , թիվ 24014/05, § 171, 2015 թվականի ապրիլի 14, հաջորդող հղումների հետ միասին): Այդպիսի քննության հիմնական նպատակը կյանքի իրավունքը պաշտպանող ներպետական օրենսդրության արդյունավետ կիրարկման ապահովումն է: Նույն չափանիշները կիրառվում են նաեւ

պարտադիր զինվորական ծառայության ընթացքում մահվան դեպքերով, այդ թվում՝ ժամկետային զինծառայողների ինքնասպանությունների դեպքերով իրականացվող քննության նկատմամբ (տե՛ս վերելում հիշատակված՝ Մալիկ Բաբաեի գործը, § 79, եւ դրանում մեջբերված գործերը, ինչպես նաեւ վերելում հիշատակված՝ Նանա Մուրադյանի գործը, § 124):

97. Քննությունը պետք է արդյունավետ լինի այն իմաստով, որ այն պետք է հնարավորություն տա պարզելու փաստական հանգամանքները եւ հնարավորության դեպքում ի հայտ բերելու ու պատժելու մեղավորներին (տե՛ս վերելում հիշատակված՝ Մուսթաֆա Թունջի եւ Ֆեջիրե Թունջի գործը, § 172): Այն պետք է նաեւ լինի բազմակողմանի, ինչը նշանակում է, որ իշխանությունները պետք է լրջորեն փորձեն պարզել տեղի ունեցածը եւ չպետք է հիմնվեն հապճեպ կամ անհիմն եզրակացությունների վրա՝ քննությունն ավարտելու կամ դրանք իրենց որոշումների համար որպես հիմք ընդունելու համար (տե՛ս Մոկանուն եւ այլք ընդդեմ Ռումինիայի [ՄՊ] [Mocanu and Others v. Romania [GC]], թիվ 10865/09 եւ 2 այլ, § 325, ՄԻԵԴ 2014, եւ Էլ-Մասրին ընդդեմ Մակեդոնիայի նախկին Հարավսլավական Հանրապետության [ՄՊ] [El-Masri v. the former Yugoslav Republic of Macedonia [GC]], թիվ 39630/09, § 183, ՄԻԵԴ 2012): Այս համատեքստին բնորոշ է անհապաղ եւ ողջամիտ ժամկետում գործելու պահանջը (տե՛ս Ալ-Սկեինին եւ այլք ընդդեմ Միացյալ Թագավորության [ՄՊ] [Al-Skeini and Others v. the United Kingdom [GC]], թիվ 55721/07, § 167, ՄԻԵԴ 2011):

98. Արդյունավետ քննություն իրականացնելու պարտավորությունը ոչ թե արդյունքների հասնելու, այլ միջոց կիրառելու պարտավորություն է. պետական իշխանության մարմինները պետք է ձեռնարկեն հնարավոր բոլոր ողջամիտ միջոցները՝ ձեռք բերելու համար տվյալ դեպքի վերաբերյալ ապացույցներ, ներառյալ, *inter alia*, վկաների ցուցմունքներ, փորձաքննության արդյունքներ եւ անհրաժեշտության դեպքում՝ դիակի դատաբժշկական փորձաքննություն, որի միջոցով հնարավոր է ստանալ վնասվածքի ամբողջական եւ ճշգրիտ պատկերը եւ կլինիկական եզրակացությունների, այդ թվում՝ մահվան պատճառների օբյեկտիվ

վերլուծությունը: Քննության արդյունավետությունը, սակայն, չի կարող գնահատվել միայն կազմված արձանագրությունների, հարցաքննված վկաների կամ կատարված այլ քննչական գործողությունների թվով: Քննության արդյունքները պետք է հիմնված լինեն համապատասխան բոլոր բաղադրիչների բազմակողմանի, օբյեկտիվ եւ անկողմնակալ վերլուծության վրա: Քննության համար ակնհայտորեն անհրաժեշտ միջոցները պատշաճ կերպով չձեռնարկելը էականորեն խոչընդոտում է գործի փաստական հանգամանքները պարզելու եւ հնարավորության դեպքում՝ մեղավորներին ի հայտ բերելու՝ նախաքննության մարմնի հնարավորությունը եւ կարող է հակասել արդյունավետության պահանջվող չափանիշին (տե՛ս վերելում հիշատակված՝ Մուրադյանի գործը, § 135, հաջորդող հղումների հետ միասին, եւ Նանա Մուրադյանի գործը, § 126):

99. Բացի այդ, քննությունը պետք է այնքանով հասանելի լինի տուժողի մերձավորին, որքանով դա անհրաժեշտ է նրա օրինական շահերը պաշտպանելու համար: Նաեւ պետք է լինի քննության հանրային վերահսկողության բավարար տարր, որի աստիճանը կարող է գործից գործ տարբեր լինել (տե՛ս Հյու Ջորդանն ընդդեմ Միացյալ Թագավորության [Hugh Jordan v. the United Kingdom], թիվ 24746/94, § 109, 2001 թվականի մայիսի 4):

100. Ի վերջո, քննության բավականաչափ արդյունավետ լինելու հարցը պետք է գնահատվի համապատասխան բոլոր փաստերի հիման վրա, ինչպես նաեւ հաշվի առնելով նախաքննության մարմնի աշխատանքի գործնական հանգամանքները: Քննության արդյունավետության նվազագույն շեմը բավարարող վերահսկողության բնույթը եւ աստիճանը կախված են կոնկրետ գործի հանգամանքներից (տե՛ս, ի թիվս այլ վճիռների, վերելում հիշատակված՝ Մուրադյանի գործը, § 136, հաջորդող հղումների հետ միասին, եւ Նանա Մուրադյանի գործը, §127):

բ) Այս սկզբունքների կիրառումը սույն գործով

i) Նյութափրավական հայեցակետը

101. Դիմումատուի որդին՝ Տ. Վարյանը, եղել է ժամկետային զինծառայող, որը իշխանության մարմինների հսկողության եւ պատասխանատվության ներքո պարտադիր զինվորական ծառայություն անցնելիս մահացել է (տե՛ս վերելում՝ 89-րդ պարբերության մեջ մեջբերված նախադեպային իրավունքը):

102. Ներպետական վարույթների շրջանակներում (տե՛ս վերելում՝ 44-րդ եւ 46-րդ պարբերությունները), ինչպես նաեւ Դատարան ներկայացրած իր գանգատում դիմումատուն ակնհայտորեն կասկածի տակ է դրել իշխանության մարմինների այն եզրահանգումը, ըստ որի՝ իր որդին կատարել է ինքնասպանություն: Այնուամենայնիվ, իր նկատառումներում թեպետ դիմումատուն շարունակել է բողոքել, որ քննությամբ չեն պարզվել իր որդու մահվան հանգամանքները եւ պնդել է, որ միակ առաջադրված վարկածը եղել է ինքնասպանությունը (տե՛ս վերելում՝ 79-րդ պարբերությունը), նա բացահայտորեն բողոքել է, որ իր որդին կատարել է ինքնասպանություն՝ գտնվելով իշխանության մարմինների բացառիկ հսկողության ներքո եւ նրա նկատմամբ շարունակաբար դրսեւորված վատ վերաբերմունքի հետեւանքով (տե՛ս վերելում՝ 77-րդ եւ 78-րդ պարբերությունները), եւ չի ներկայացրել որեւէ կոնկրետ փաստարկ, որով ըստ էության կվիճարկվեր քննության այն եզրակացությունը, որ նրա որդին գործել է ինքնասպանություն (ի հակադրություն դրա՝ Այվազյանն ընդդեմ Հայաստանի [Ayvazyan v. Armenia], թիվ 56717/08, § 87, 2017 թվականի հունիսի 1, եւ վերելում հիշատակված՝ Նանա Մուրադյանի գործը, § 129, եւ որպես համեմատություն՝ վերելում հիշատակված՝ Հովհաննիսյանի եւ Նազարյանի գործը, § 132):

103. Դատարանը նշում է, որ քննության իրականացման գործընթացում առկա են եղել մի շարք լուրջ թերություններ, ինչի հետեւանքով չեն պարզաբանվել Տ. Վարյանի մահվան մի շարք կարեւոր հանգամանքներ, այդ թվում, ի թիվս այլնի, նրա մարմնի վրա մի շարք չպարզաբանված ոչ հրազենային վնասվածքների առկայությունը, ինչպես նաեւ դեպքի օրը տեղի ունեցած

իրադարձությունների նկարագրության մասով ծառայողական քննության եզրակացության եւ քրեական գործով քննության եզրահանգումների միջեւ փաստացի անհամապատասխանությունները (տե՛ս ստորել՝ 122-126-րդ պարբերությունները):

104. Այնուամենայնիվ, Դատարան ներկայացված նյութը թույլ չի տալիս «ողջամիտ կասկածից վեր» չափանիշով (տե՛ս վերելում՝ 95-րդ պարբերության մեջ մեջբերված նախադեպային իրավունքը) հաստատել այն վարկածը, որ Ս. Վարյանի կյանքը դիտավորյալ են խլել (ի հակադրություն դրա՝ վերելում հիշատակված՝ Բեկերի գործը, §§ 45-54, եւ Լապշինն ընդդեմ Ադրբեջանի [Lapshin v. Azerbaijan], թիվ 13527/18, §§ 110-20, 2021 թվականի մայիսի 20, տե՛ս նաեւ, mutatis mutandis Միժիգարովան ընդդեմ Սլովակիայի [Mižigárová v. Slovakia], թիվ 74832/01, § 89, 2010 թվականի դեկտեմբերի 14): Այսպիսով, Ս. Վարյանի սպանության վերաբերյալ ցանկացած պնդում կրում է բացառապես ենթադրական բնույթ (տե՛ս, mutatis mutandis, Դուրդուն ընդդեմ Թուրքիայի [Durdu v. Turkey], թիվ 30677/10, §§ 59-61, 2013 թվականի սեպտեմբերի 3, վերելում հիշատակված՝ Նանա Մուրադյանի գործը, §§ 130-31, եւ վերելում հիշատակված Հովհաննիսյանի եւ Նազարյանի գործը, §§ 134-31):

105. Համաձայն քննության (թե՛ քրեական գործով եւ թե՛ ծառայողական) եզրահանգումների եւ ավագ լեյտենանտ Հ.Հ.-ին եւ կրտսեր սերժանտ Է.Ս.-ին եւ Գ.Ս.-ին առաջադրված մեղադրանքների (տե՛ս վերելում՝ 29-րդ, 30-րդ եւ 35-րդ պարբերությունները)՝ Ս. Վարյանը գործել է ինքնասպանություն նրա վերադասների եւ ծառայակիցների կողմից շարունակաբար դրսեւորված վատ վերաբերմունքի եւ ոտնձգությունների հետեւանքով (տե՛ս, մասնավորապես, վերելում՝ 38-րդ, 40-րդ, 41-րդ եւ 45-րդ պարբերությունները):

106. Կառավարությունը պնդել է, որ չնայած ներպետական մակարդակում անցկացված քննությունների եզրահանգումների՝ իշխանության մարմինները չպետք է պատասխանատվության ենթարկվեն Ս. Վարյանի մահվան համար, քանի որ նրա մոտ չի դրսեւորվել որեւէ նշան, որ նա կարող էր որոշել վերջ դնել իր կյանքին (տե՛ս վերելում՝ 80-րդ եւ 81-րդ պարբերությունները):

107. Դատարանը, այնուամենայնիվ, վերահաստատում է, որ բանակում ինքնասպանության դեպքերով նախկինում գտել է, որ պետությունը պատասխանատվություն է կրում այն տուժողների մահվան համար, որոնց դրդել են ինքնասպանության՝ զինվորական ծառայության ընթացքում ծաղրուծանակի ենթարկելով եւ վատ վերաբերմունք ցուցաբերելով (տե՛ս վերելում՝ 94-րդ պարբերության մեջ մեջբերված նախադեպային իրավունքը, տե՛ս նաեւ վերելում հիշատակված՝ Հովհաննիսյանի եւ Նազարյանի գործը, § 135):

108. Ավելին, ներպետական իշխանություններից պահանջվում է ձեռնարկել գործնական միջոցներ, որոնք ուղղված են ժամկետային զինծառայողներին զինվորական կյանքին ներհատուկ վտանգներից արդյունավետորեն պաշտպանելուն, եւ պատշաճ ընթացակարգեր այն թերությունները եւ սխալները հայտնաբերելու համար, որոնք այդ առնչությամբ կարող են առաջանալ տարբեր մակարդակներում պատասխանատուների կողմից: Իշխանություններից նաեւ պահանջվում է պայմանագրային զինծառայողների շրջանում ապահովել բարձր մասնագիտական չափանիշներ՝ ժամկետային զինծառայողներին պաշտպանելու նպատակով (տե՛ս վերելում՝ 90-րդ եւ 91-րդ պարբերություններում մեջբերված նախադեպային իրավունքը):

109. Դատարանն այս առնչությամբ նշում է, որ ներպետական մակարդակում իրականացված քննության ընթացքում ձեռք բերված ապացույցներով (ինչպես նաեւ ծառայողական քննության եզրահանգումներով) հաստատվել է Տ. Վարյանին իր վերադասների եւ ծառայակիցների կողմից դաժանաբար նվաստացնելու, ծաղրուծանակի ենթարկելու եւ ֆիզիկական բնույթի վատ վերաբերմունք ցուցաբերելու, այդ թվում՝ բռնություն գործադրելու եւ ֆիզիկական շահագործման ենթարկելու կրկնվող դեպքերի մի ամբողջ շղթա, ինչը ճանաչվել է որպես նրա կողմից ինքնասպանություն գործելու պատճառ (տե՛ս վերելում՝ 37-րդ, 40-րդ եւ 41-րդ պարբերությունները): Մասնավորապես ավագ լեյտենանտ Հ.Հ.-ն՝ Տ. Վարյանի վերադասը, հայիոյանքներ է հնչեցրել նրա հասցեին եւ հարվածել է նրան մի քանի անգամ այնպիսի անհիմն

պատրվակներով, ինչպիսիք են, օրինակ, Հ.Հ.-ի գլխարկը անմիջապես չբերելը կամ մեկ այլ դեպքում՝ նրա գոտին չտալը (տե՛ս վերելում՝ 16-րդ, 18-րդ եւ 22-րդ պարբերությունները): Ավագ լեյտենանտ Հ.Հ.-ն նաեւ նվաստացրել է Տ. Վարյանին, ի թիվս այլնի, ստիպելով նրան կատարել լրացուցիչ աշխատանք, ինչպես օրինակ՝ զուգարանի համար փոս փորելը (տե՛ս վերելում՝ 13-րդ եւ 14-րդ պարբերությունները), եւ նրան վրդովվեցնելու նպատակով նրա սեռական կյանքի վերաբերյալ անպարկեշտ կատակներ անելով (տե՛ս վերելում՝ 21-րդ պարբերությունը): Տ. Վարյանի նկատմամբ վատ վերաբերմունք է ցուցաբերել նաեւ կրտսեր սերժանտ Գ.Մ.-ն (տե՛ս վերելում՝ 14-րդ եւ 22-րդ պարբերությունները), մեկ այլ ժամկետային զինծառայող, որի ենթական եղել է Տ. Վարյանը, ինչի մասին վկայում են նրան առաջադրված մեղադրանքները (տե՛ս վերելում՝ 51-րդ եւ 43-րդ պարբերությունները), եւ բազմիցս՝ կրտսեր սերժանտ Է.Ս.-ն, որը եւս եղել է ժամկետային զինծառայող (տե՛ս վերելում՝ 14-րդ եւ 16-րդ պարբերությունները):

110. Դատարանը նաեւ նշում է, որ կողմերի միջեւ վիճելի է եղել Տ. Վարյանին բանակ զինակոչելիս մարտական կամ ոչ մարտական ծառայության համար պիտանի ճանաչելու փաստը (տե՛ս վերելում՝ 6-րդ պարբերությունը): Այս առնչությամբ այն նկատում է, որ զորակոչի գործընթացի շրջանակներում իրականացված պարտադիր բժշկական զննության ընթացքում Տ. Վարյանի մոտ ախտորոշվել է կոնկրետ սրտային պաթոլոգիա (միտրալ փականի արտանկում, որն առաջացնում է միտրալ հետհոսք), եւ որ Կառավարության կողմից տրամադրված նրա անձնական գործում առկա չէ Կենտրոնական բժշկական հանձնաժողովի այն որոշումը, որով Տ. Վարյանը ճանաչվել է մարտական ծառայության համար պիտանի (տե՛ս վերելում՝ 6-րդ պարբերությունը): Միաժամանակ դիմումատուն իր գանգատի մեջ եւ հետագայում Դատարանում բերված իր փաստարկներում պնդել է, որ իր որդին զորակոչվել է ոչ մարտական ծառայության (տե՛ս վերելում՝ 78-րդ պարբերությունը), մինչդեռ ծառայողական քննությանը վերաբերող փաստաթղթերում, մասնավորապես՝

ծառայողական հանձնաժողովի արձանագրության եւ 2012 թվականի մարտի 13-ին Պաշտպանության նախարարության կողմից արձակված որոշման մեջ արտացոլված է այն փաստը, որ Ս. Վարյանը զորակոչվել է 26-րդ կետի «դ» ենթակետով եւ 17-րդ կետի «բ» ենթակետով (Պաշտպանության նախարարի 2010 թվականի փետրվարի 26-ի թիվ 175 հրամանի թիվ 1 հավելված. տե՛ս վերելում՝ 40-րդ եւ 41-րդ պարբերությունները): Դատարանը այս առնչությամբ նշում է, որ իր հետագա նկատառումներում Կառավարությունը ներառել է տվյալ ժամանակահատվածում գործող եւ, ի թիվս այլնի, զորակոչից առաջ բժշկական զննության իրականացման կարգը կարգավորող թիվ 175 որոշմանը հղում, որի թիվ 1 հավելվածում՝ 26-րդ կետի «դ» ենթակետում, նշվում է, որ այն անձինք, որոնց մոտ ախտորոշվել է տվյալ փաստաթղթում նշված սրտային պաթոլոգիան, պիտանի են միայն ոչ մարտական ծառայության համար (տե՛ս վերելում՝ 65-րդ պարբերությունը): Չնայած նույն որոշման մեջ նշվում է, որ Կենտրոնական բժշկական հանձնաժողովի որոշումները զինակոչիկների վերաբերյալ վերջնական են, դրանում նաեւ նշվում է, որ Կենտրոնական ռազմաբժշկական հանձնաժողովը որոշումներ է ընդունում ստորադաս փորձաքննական մարմինների եզրակացությունների հաստատման կամ մերժման, ինչպես նաեւ, ըստ անհրաժեշտության, զինծառայողներին եւ զինապարտներին փորձաքննության ենթարկելու վերաբերյալ (տե՛ս վերելում՝ 64-րդ պարբերությունը):

111. Այս հանգամանքներում, հաշվի առնելով, որ դիմումատուն չի ներկայացրել որեւէ պարզաբանում կամ բացատրություն, այդ թվում՝ առ այն, թե արդյոք բողոքարկվել է Կենտրոնական բժշկական հանձնաժողովի՝ Ս. Վարյանին մարտական ծառայության համար պիտանի ճանաչելու մասին որոշումը, Դատարանը չի կարող վերջնականապես արձանագրել, որ Ս. Վարյանը զորակոչվել է միայն ոչ մարտական ծառայություն իրականացնելու:

112. Ամեն դեպքում չի վիճարկվում այն փաստը, որ Ս. Վարյանը եղել է ֆիզիկապես թերզարգացած (չնայած ակնհայտորեն ոչ այնքան, որ ճանաչվեր մարտական ծառայության համար ոչ պիտանի՝ 2010 թվականի փետրվարի 26-ի

թիվ 175 հրամանի թիվ 1 հավելվածի 17-րդ կետի «բ» ենթակետի համաձայն. տե՛ս վերելում՝ 65-րդ պարբերությունը), կամ այն փաստը, որ նրա մոտ առկա է եղել սրտային պաթոլոգիա, որով պայմանավորված՝ նա հավանաբար դառնում էր մարտական ծառայության համար ոչ պիտանի: Այնուհանդերձ, նույնիսկ եթե ենթադրենք, որ Տ. Վարյանը իսկապես զորակոչվել է մարտական ծառայության, Պաշտպանության նախարարի 2012 թվականի մարտի 13-ին արձակված հրամանի մեջ նշվում է, որ միջադեպը կարող էր կանխվել, եթե «համապատասխան պաշտոնյաները ժամանակին քննեին Տ. Վարյանի՝ ֆիզիկապես թույլ լինելու հանգամանքը ...» (տե՛ս վերելում՝ 41-րդ պարբերությունը): Դատարանն այս առնչությամբ նկատում է, որ ինչպես պարզվել է քննությունների ընթացքում, Տ. Վարյանն այլ զինծառայողների փոխարեն մի քանի հերթափոխով իրականացրել է ակտիվ զինվորական ծառայություն, նրան ստիպել են անել մաքրության մեծ մասը եւ հազվադեպ տրամադրել են մի քանի օր տետղությամբ հանգիստ: Բացի այս ֆիզիկական ծանրաբեռնվածությունից՝ ընդհանուր առմամբ ընդունվել է, որ զինծառայողները, այդ թվում՝ նրա անմիջական վերադասը՝ ավագ լեյտենանտ Հ.Հ.-ն մշտապես ծաղրուծանակի են ենթարկել Տ. Վարյանին՝ բռնություն գործադրելով եւ ծաղրելով, անվանարկելով նրան եւ այլն, այնքան, որ նա նախընտրել է շարունակաբար հերթապահություն իրականացնել, միայն թե խուսափեր այդ կերպ իր հետ վարվողներից (տե՛ս, մասնավորապես, վերելում՝ 14-րդ եւ 17-րդ պարբերությունները):

113. Դատարանը նշում է, որ Տ. Վարյանի վերադասներից առնվազն երկուսը (ավագ լեյտենանտ Հ.Հ.-ից բացի, որը ակնհայտորեն եղել է Տ. Վարյանի նկատմամբ ցուցաբերված վատ վերաբերմունքի ամենաակտիվ մասնակիցներից մեկը) տարբեր չափով տեղեկացված են եղել բռնության մասին, սակայն ակնհայտորեն չեն զեկուցել դրա մասին իրենց վերադասներին եւ ոչ էլ միջոցներ են ձեռնարկել ինքնուրույն դրա դեմ պայքարելու համար: Մասնավորապես ավագ սերժանտ Վ.Ն.-ը նշել է, որ տեղեկացել է դեպքի մասին 2011 թվականի նոյեմբերին, երբ ավագ լեյտենանտ Հ.Հ.-ն ծեծել է Տ. Վարյանին (տե՛ս վերելում՝

18-րդ պարբերությունը), իսկ կապիտան Ա.Հ.-ն բացահայտ ընդունել է, որ նա չի ձեռնարկել միջոցներ՝ իրականում տեղի ունեցածը պարզելու համար պարզապես այն պատճառով, որ նրան զեկուցել են, որ ամեն ինչ կարգին է, եւ նա համարել է, որ ծառայակիցները պարզապես կատակներ են արել, այլ ոչ թե ծաղրել են Տ. Վարյանին: Կապիտան Ա.Հ.-ն չի զեկուցել ավագ լեյտենանտ Հ.Հ.-ի կողմից իր պարտականությունները չկատարելու մասին իր վերադասին, որն էլ չի ձեռնարկել որեւէ քայլ՝ այդ առնչությամբ ներկայացված բողոքի մասով (տե՛ս վերելում՝ 26-րդ պարբերությունը):

114. Դեպքի օրվա եւ նախորդող երկու օրերին տեղի ունեցած իրադարձությունների առնչությամբ Դատարանը նշում է հետեւյալը:

115. 2012 թվականի փետրվարի 27-ին, այսինքն՝ դեպքից երկու օր առաջ, Տ. Վարյանի նկատմամբ եւս մեկ անգամ վատ վերաբերմունք է դրսևորվել, այս անգամ կրտսեր սերժանտ Է.Ս.-ի կողմից, որը ստորացրել եւ հարվածել է նրան՝ (տե՛ս վերելում՝ 16-րդ պարբերությունը) ափսեները լվանալու վերաբերյալ տարածայնության պատճառով (կամ մաքրության պատճառով՝ համաձայն հանձնաժողովի արձանագրության. տե՛ս վերելում՝ 40-րդ պարբերությունը): Տ. Վարյանի հանդեպ վատ վերաբերմունք էր դրսևորվել նաեւ դեպքին նախորդող գիշերը: Մասնավորապես 2012 թվականի փետրվարի 28-ի երեկոյան, թե՛ կրտսեր սերժանտ Է.Ս.-ն եւ թե՛ ավագ լեյտենանտ Հ.Հ.-ն ստորացրել եւ ֆիզիկական բռնության են ենթարկել Տ. Վարյանին եւս մեկ անգամ, ինչը, ըստ շարքային Ռ.Ա.-ի, ըստ երեւոյթին, շատ է վշտացրել նրան (տե՛ս վերելում՝ 14-րդ պարբերությունը): Որեւէ բան առնվազն առկա նյութերում չի վկայում այն մասին, որ այլ նշանակալից դեպք է տեղի ունեցել այս իրադարձությունների միջեւ եւ հաջորդ առավոտյան, երբ Տ. Վարյանը հայտնաբերվել է մահացած:

116. Ամփոփելով կարող ենք ասել, որ Դատարան ներկայացված նյութերը, այդ թվում, ի թիվս այլնի, հետմահու իրականացված հոգեբուժական փորձաքննության արձանագրությունը (տե՛ս վերելում՝ 37-րդ պարբերությունը), ծառայողական հանձնաժողովի արձանագրությունը եւ Պաշտպանության

նախարարի 2012 թվականի մարտի 13-ի հրամանը (տե՛ս վերելում՝ 40-րդ եւ 41-րդ պարբերությունները), ինչպես նաեւ քրեական գործով ներպետական դատարանների եզրահանգումները (տե՛ս մասնավորապես վերելում՝ 45-րդ պարբերությունը), ավելի քան բավարար են եզրակացնելու համար, որ Տ. Վարյանը դարձել է իր անմիջական վերադասների (ավագ լեյտենանտ Հ.Հ.) եւ ծառայակիցների (կրտսեր սերժանտ Գ.Մ. եւ Է.Ս.) կողմից կատարված ծանր եւ երկարաժամկետ բռնության զոհ, եւ որ որեւէ միջոց չի ձեռնարկվել նրան այդ բռնությունից արդյունավետորեն պաշտպանելու համար, որը, ինչպես նախկինում ընդունվել է, դարձել է նրա կողմից ինքնասպանություն գործելու պատճառ:

117. Կառավարությունը հղում է կատարել Ներքին ծառայության կանոնագրքի 6-րդ հոդվածին (տե՛ս վերելում՝ 61-րդ պարբերությունը, Ներքին ծառայության կանոնագրքի 11-րդ եւ 12-րդ հոդվածների համար տե՛ս նաեւ վերելում՝ 62-րդ եւ 63-րդ պարբերությունները) պնդելու համար, որ ներպետական օրենսդրությամբ նախատեսված են, ի թիվս այլնի, պաշտպանության արդյունավետ միջոցներ՝ զինծառայողների անվտանգությունը եւ պաշտպանվածությունն ապահովելու համար (տե՛ս վերելում՝ 82-րդ պարբերությունը): Դատարանը նշում է սակայն, որ Ներքին ծառայության կանոնագրքի որեւէ մեջբերված դրույթ ոչ միայն չի վերաբերում զինվորական ծառայության ընթացքում ցուցաբերվող վատ վերաբերմունքից պաշտպանության կոնկրետ միջոցառումներին, այլեւ ինքնասպանության դեպքերի կանխմանն ուղղված միջոցառումներին, ինչպես օրինակ՝ հոգեբանական աջակցության տրամադրումը: Դատարանը նախկինում՝ զինվորական ծառայության ընթացքում ենթադրյալ ինքնասպանության մեկ այլ գործով գտել է, որ տվյալ ժամանակահատվածում Հայաստանի զինված ուժերում չի գործել հոգեբանական գնահատման եւ աջակցության համակարգ, այդ թվում՝ նախնական եւ հետագա հոգեբանական հետազոտության, ինքնասպանության դեպքերի կանխման եւ հոգեբանական աջակցության տրամադրման մասով (տե՛ս վերելում հիշատակված՝ Հովհաննիսյանի եւ Նազարյանի գործը, §§ 139-144): Ի վերջո,

Դատարանն այս առնչությամբ նշում է, որ Պաշտպանության նախարարն իր 2012 թվականի մարտի 13-ի հրամանի մեջ հիշատակել է «Ինքնասպանության եւ ինքնավնասման դեպքերի կանխարգելման խումբը» (տե՛ս վերելում՝ 41-րդ պարբերությունը): Չնայած կողմերի փաստարկներում առկա չի եղել որեւէ տեղեկություն՝ զինված ուժերում այդ խմբի կարգավիճակի եւ դերի մասին, Դատարանը նշում է, որ ցանկացած պարագայում նույն հրամանի մեջ նշված է եղել, որ խումբը չի կատարել «զինծառայողների հետ կոնկրետ կանխարգելիչ աշխատանք» (նույն տեղում): Ամեն դեպքում Կառավարության փաստարկներում կամ Դատարան ներկայացված նյութերում որեւէ բան չի փաստում այն մասին, որ հոգեբանական աջակցություն է տրամադրվել Տ. Վարյանին, որը, ըստ զինվորական մարմինների, եղել է «ֆիզիկապես թույլ, ինքնամեկուսացված եւ անինքնավստահ», հետեւաբար գտնվել է խոցելի վիճակում (տե՛ս վերելում՝ 40-րդ եւ 41-րդ պարբերությունները, եւ տե՛ս, mutatis mutandis, վերելում հիշատակված՝ Հովհաննիսյանի եւ Նազարյանի գործը, § 144):

118. Հաշվի առնելով այս բոլոր նկատառումները՝ Դատարանը եզրակացնում է, որ տվյալ դեպքում իշխանության մարմինները չեն կատարել իրենց հսկողության ներքո գտնվելու ընթացքում Տ. Վարյանի կյանքի իրավունքը պաշտպանելու իրենց դրական պարտավորությունը:

119. Հետեւաբար տեղի է ունեցել Կոնվենցիայի 2-րդ հոդվածի խախտում՝ նյութաիրավական հայեցակետի մասով:

ii) Դատավարական հայեցակետը

120. Դատարանը նախեւառաջ նշում է, որ Պաշտպանության նախարարության քննչական ծառայությունն իր սեփական նախաձեռնությամբ քննություն է սկսել դեպքի օրը, այսինքն՝ 2012 թվականի փետրվարի 29-ին (տե՛ս վերելում՝ 8-րդ եւ 9-րդ պարբերությունները): Քրեական գործով քննությունը, որի հետեւանքով հետապնդում է իրականացվել, եւ դատապարվել է Տ. Վարյանի

վերադասը՝ ավագ լեյտենանտ Հ.Հ.-ն, եւ կրտսեր սերժանտներ Գ.Մ.-ն եւ Է.Ս.-ն, կատարվել է շատ արագ՝ դեպքի օրվանից առնվազն մեկ տարվա ընթացքում, այսինքն՝ մոտավորապես 2013 թվականի հունվարին (տե՛ս վերելում՝ 9-րդ եւ 38-րդ պարբերությունները), իսկ դատավարությունն ավարտվել է 2013 թվականի օգոստոսին (տե՛ս վերելում՝ 45-րդ պարբերությունը), այսինքն՝ մեղադրական ակտը կազմվելուց առնվազն յոթ ամիս հետո: Հետեւաբար Դատարանը գտնում է, որ քննությունն իրականացվել է անհրաժեշտ բարեխղճությամբ, եւ այն անհիմն չի ձգձգվել:

121. Ելնելով վերոնշյալից՝ Դատարանը վերահաստատում է, որ այսպիսի քննությունները պետք է լինեն բազմակողմանի, ինչը նշանակում է, որ իշխանության մարմինները պետք է լրջորեն փորձեն պարզել տեղի ունեցածը եւ չպետք է հիմնվեն հապճեպ կամ անհիմն եզրակացությունների վրա՝ քննությունն ավարտելու կամ դրանք իրենց որոշումների համար որպես հիմք ընդունելու համար (տե՛ս վերելում՝ 97-րդ պարբերությունում մեջբերված նախադեպային իրավունքը):

122. Դատարանը նկատում է, որ չնայած ձեռնարկված բոլոր միջոցառումներին, որոնք նշել է Կառավարությունը (տե՛ս մասնավորապես վերելում՝ 84-րդ պարբերությունը)՝ քննությամբ չի բացահայտվել Տ. Վարյանի մահվան մի քանի կարեւոր հանգամանքներ:

123. Մասնավորապես որեւէ պատշաճ բացատրություն չի տրվել ոչ հրազենային վնասվածքների բնույթի եւ ծագման առնչությամբ, որոնք հայտնաբերվել են դիակերձման ընթացքում եւ տեսանելի են եղել դեպքի վայրի զննության ընթացքում արված լուսանկարներում (տե՛ս վերելում՝ 10-րդ, 33-րդ եւ 36-րդ պարբերությունները), այդ թվում՝ քթի արմատին եւ երկու կոպերին առկա վերքերը: Համաձայն դիակերձման արձանագրության՝ այս վնասվածքները հասցվել են կոշտ, բույթ առարկայով (կամ առարկաներով) Տ. Վարյանի մահվանից կարճ ժամանակ առաջ եւ ուղղակիորեն կապված չեն մահվան պատճառի հետ (տե՛ս վերելում՝ 33-րդ պարբերությունը): Կառավարությունն այս

առնչությամբ հղում է կատարել դիահերձումն իրականացրած դատաբժշկական փորձագետի կողմից դիահերձման արձանագրության տրամադրումից հետո անցկացված հարցաքննության ընթացքում տրված ցուցմունքին, որով նա, ըստ էության, հրաժարվել է դրանում արձանագրված իր այն եզրակացությունից, որ տվյալ ոչ հրազենային վնասվածքները հասցվել են մահվանից կարճ ժամանակ առաջ (տե՛ս վերելում՝ 36-րդ պարբերությունը): Դատարանը նախելառաջ նկատում է, որ տվյալ ժամանակահատվածում գործող քրեական դատավարության իրավունքի համաձայն՝ դատաբժշկական փորձագետը կարող է հարցաքննվել միայն իր եզրակացությունը պարզաբանելու կամ կիրառված մեթոդները կամ օգտագործված մեթոդաբանությունը պարզաբանելու համար: Սակայն փորձագետի հարցաքննության արձանագրությունը չի կարող փոխարինել նրա եզրակացությանը (տե՛ս վերելում՝ 57-րդ և 58-րդ պարբերությունները): Երկրորդ, տվյալ դատաբժշկական փորձագետն անձամբ կատարել է դիահերձումը, արձանագրել է համապատասխան վնասվածքները և հայտնել է իր պաշտոնական կարծիքը, որ դրանք հասցվել են մինչև մահը վրա հասնելը: Այսպիսի հանգամանքներում նույն փորձագետի կողմից կտրականապես այլ կարծիք հայտնելն իր արձանագրությունը տրամադրելուց մոտ հինգ ամիս հետո՝ քննիչի կողմից նրան ցույց տրված լուսանկարների հիման վրա (տե՛ս վերելում՝ 33-րդ և 36-րդ պարբերությունները), դժվար թե կարելի է համարել այն ոչ հրազենային վնասվածքների պատշաճ բացատրությունը, որոնք առկա են եղել մարմնի վրա, երբ այն հայտնաբերվել է:

124. Ավելին, համաձայն կրտսեր սերժանտ Է.Ս.-ի և շարքային Ռ.Ա.-ի՝ 2012 թվականի փետրվարի 29-ի առավոտյան տեղի ունեցած իրադարձությունների նկարագրության (տե՛ս, *inter alia*, վերելում՝ 13-րդ, 14-րդ և 21-րդ պարբերությունները)՝ նկարագրություն, որը երկուսն էլ շարունակել են պնդել ավագ լեյտենանտ Հ.Հ.-ի հետ իրենց համապատասխան առերեսումների ընթացքում (տե՛ս վերելում՝ 24-րդ և 25-րդ պարբերությունները), Հ.Հ.-ն գնացել է հենակետ Տ. Վարյանի մարմինն այնտեղ հայտնաբերվելուց կարճ ժամանակ

առաջ. փաստ, որը միայն նա է հերքել քննության ընթացքում, ինչպես նաև ծառայողական քննության ընթացքում (տե՛ս վերելում՝ 17-րդ և 40-րդ պարբերությունները): Սակայն նախաքննության մարմինը ոչ միայն չի փորձել պարզաբանել հարցը, այլև այս կարևոր բաղադրիչը լիովին դուրս է թողնվել մեղադրական եզրակացության մեջ շարադրված իրադարձությունների նկարագրությունից (տե՛ս վերելում՝ 38-րդ պարբերությունը):

125. Ավելին, չնայած ծառայողական քննության արձանագրությունը, որը պարունակել է Տ. Վարյանի մահվան հանգամանքների առնչությամբ մի շարք փաստացի եզրահանգումներ, դրան նախորդող իրադարձությունները և զինծառայակիցների միջև առկա անառողջ միջավայրի և ոչ կանոնադրական հարաբերությունների ընդհանուր գնահատականը (տե՛ս վերելում՝ 40-րդ պարբերությունը) ըստ էության ներառվել է քրեական գործի նյութերում, նախաքննության մարմինների կողմից պարզված իրադարձությունների տարբերակի և ծառայողական քննության հանձնաժողովի կողմից պարզված իրադարձությունների տարբերակի միջև առկա են եղել մի շարք զգալի անհամապատասխանություններ, որոնց վերաբերյալ պարզաբանումներ չեն տրվել և ոչ էլ անդրադարձ է կատարվել մեղադրական եզրակացության մեջ (տե՛ս վերելում՝ 38-րդ պարբերությունը): Օրինակ՝ համաձայն ծառայողական հանձնաժողովի արձանագրության՝ Տ. Վարյանի նկատմամբ ցուցաբերված վատ վերաբերմունքի որոշ դրվագներ, այդ թվում՝ հերթապահության ընթացքում քուն մտնելու և զուգարանի համար պարտադրաբար փոս փորելու մասով, վերագրվել են կրտսեր սերժանտ Է.Ս.-ին (տե՛ս վերելում՝ 40-րդ պարբերությունը), մինչդեռ քրեական գործով քննության ընթացքում նույն դրվագները վերագրվել են ավագ լեյտենանտ Հ.Հ.-ին (տե՛ս վերելում՝ 38-րդ պարբերությունը)՝ առանց որեւէ կոնկրետ բացատրության: Ավելին, համաձայն ծառայողական հանձնաժողովի արձանագրության՝ կրակոցը լսելուն պես բոլորը (ենթադրաբար հիշյալ երեք ծառայողները) գնացել են հենակետ և հայտնաբերել են մարմինը (տե՛ս վերելում՝ 40-րդ պարբերությունը), մինչդեռ համաձայն մեղադրական ակտի՝ կրտսեր

սերժանտ Է.Ս.-ն է հայտնաբերել մարմինը, որից հետո ավագ լեյտենանտն ուղևորվել է հենակետ, եւ մեղադրական եզրակացության մեջ առկա չէ որեւէ նշում, որ լսվել է կրակոց (տե՛ս վերելում՝ 38-րդ պարբերությունը)՝ չնայած շարքային Ռ.Ա.-ն նշել է դա իր՝ 2012 թվականի փետրվարի 29-ի ցուցմունքի մեջ (տե՛ս վերելում՝ 14-րդ պարբերությունը):

126. Ի վերջո, Դատարանը նկատում է, որ 2012 թվականի օգոստոսի 15-ի իրենց համատեղ փորձագիտական եզրակացության մեջ ձգաբանական եւ դատաբժշկական փորձագետների հանձնաժողովը նշել է, որ Տ. Վարյանի հրագենային վիրավորումը կարող էր նաեւ հասցված լինել մեկ այլ անձի կողմից (տե՛ս վերելում՝ 34-րդ պարբերությունը): Այնուհանդերձ, քննության ընթացքում, ըստ էության, այս վարկածը որեւէ տրամաբանական զարգացում չի ունեցել:

127. Դատարանն այս առնչությամբ վերահաստատում է, որ քննության արդյունավետությունը չի կարող գնահատվել միայն կազմված զեկույցների, հարցաքննված վկաների կամ ձեռնարկված այլ քննչական միջոցառումների թվով: Քննության եզրակացությունները պետք է հիմնված լինեն բոլոր համապատասխան բաղադրիչների բազմակողմանի, օբյեկտիվ եւ անկողմնակալ վերլուծության վրա (տե՛ս վերելում՝ 98-րդ պարբերությունում մեջբերված նախադեպային իրավունքը), ինչը, ինչպես ցույց է տրվել վերելում՝ 122-126-րդ պարբերություններում, չի եղել Տ. Վարյանի մահվան հանգամանքների քննության դեպքում:

128. Այս համատեքստում Դատարանը լուրջ կասկածներ ունի քրեական գործով ներպետական քննության պատշաճ կերպով իրականացման վերաբերյալ: Այսպիսով, այն գտնում է, որ սույն գործով իրականացված քննությունը չի եղել բավականաչափ բազմակողմանի, ինչի հետեւանքով լիովին չեն բացահայտվել Տ. Վարյանի մահվան հանգամանքները:

129. Հաշվի առնելով վերը նշված եզրահանգումը, որ Տ. Վարյանի մահվան հանգամանքների քննությունը բավականաչափ բազմակողմանի չի եղել,

Դատարանը եզրակացնում է, որ ներպետական իշխանությունները սույն գործով արդյունավետ քննություն չեն իրականացրել:

130. Հետևաբար տեղի է ունեցել Կոնվենցիայի 2-րդ հոդվածի խախտում՝ դատավարական հայեցակետի մասով:

131. Այս եզրահանգմամբ անհրաժեշտություն չկա ուսումնասիրելու քննության մնացյալ հայեցակետերը (տե՛ս, *mutatis mutandis*, Մագնիտսկին եւ այլք ընդդեմ Ռուսաստանի [Magnitskiy and Others v. Russia], թիվ 32631/09 եւ 53799/12, § 272, 2019 թվականի օգոստոսի 27, եւ Անահիտ Մկրտչյանն ընդդեմ Հայաստանի [Anahit Mkrtchyan v. Armenia], թիվ 3673/11, § 101, 2020 թվականի մայիսի 7), այդ թվում՝ դրա անկախությունը եւ հանրային վերահսկողության մակարդակը:

II. ԿՈՆՎԵՆՑԻԱՅԻ 3-ՐԴ ՀՈԴՎԱԾԻ ԵՆԹԱԴՐՅԱԼ ԽԱԽՏՈՒՄԸ

132. Դիմումատուն բողոք է ներկայացրել առ այն, որ պարտադիր զինվորական ծառայություն իրականացնելու ընթացքում իր որդու նկատմամբ ցուցաբերվել է թե՛ ֆիզիկական եւ թե՛ հոգեբանական բռնություն նրա վերադասների եւ ծառայակիցների կողմից: Նա հիմնվել է Կոնվենցիայի 3-րդ հոդվածի վրա, որն ունի հետեւյալ բովանդակությունը.

«Ոչ ոք չպետք է ենթարկվի խոշտանգումների կամ անմարդկային կամ նվաստացնող վերաբերմունքի կամ պատժի»:

133. Կառավարությունը պնդել է, որ դիմումատուի՝ Կոնվենցիայի 3-րդ հոդվածով ներկայացված բողոքը, ըստ էության, եղել է 2-րդ հոդվածով ներկայացված բողոքի կրկնությունը: Ամեն դեպքում վերաբերմունքը, որի վերաբերյալ բողոք է ներկայացվել, պետք է դիտարկվի բանակում կյանքի առանձնահատկությունների լույսի ներքո. համատեքստ, որտեղ Կոնվենցիայի 3-րդ հոդվածին հակասող վերաբերմունքի շեմը, ըստ Կառավարության, եղել է համեմատաբար բարձր: Դիմումատուի որդին եղել է կրտսեր սերժանտներ Է.Ս.-ի եւ Գ.Մ.-ի տարեկիցը, եւ նրանք գտնվել են միմյանց հետ լավ հարաբերությունների մեջ:

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

134. Դիմումատուն պնդել է իր այն բողոքը, որ իր որդին զինվորական ծառայության ընթացքում դարձել է պարբերաբար ցուցաբերված վատ վերաբերմունքի եւ նվաստացման զոհ:

135. Դատարանը նշում է, որ այս բողոքը կապված է 2-րդ հոդվածի համաձայն քննվող բողոքի հետ եւ պետք է հետեւաբար նույնպես հայտարարվի ընդունելի:

136. Հաշվի առնելով Կոնվենցիայի 2-րդ հոդվածի մասով արված եզրահանգումները (տե՛ս վերելում՝ 109-րդ, 112-րդ եւ 116-րդ պարբերությունները)՝ Դատարանը համարում է, որ կարիք չկա ուսումնասիրելու այն հարցը, թե արդյոք սույն գործով տեղի է ունեցել Կոնվենցիայի 3-րդ հոդվածի խախտում (տե՛ս, mutatis mutandis, վերելում հիշատակված՝ Մուրադյանի գործը, § 161, հաջորդող հղումների հետ միասին):

III. ԿՈՆՎԵՆՑԻԱՅԻ 13-ՐԴ ՀՈԴՎԱԾԻ ԵՆԹԱԴԻՅԱԼ ԽԱԽՏՈՒՄԸ

137. Դիմումատուն բողոքել է, որ ներպետական իշխանություններն իր որդու մահվան գործով արդյունավետ քննություն չեն իրականացրել, եւ որ ներպետական օրենսդրության համաձայն նրա կորստի հետեւանքով կրած ոչ նյութական վնասի համար պետությունից փոխհատուցում պահանջելու հնարավորություն չի եղել: Նա հիմնվել է Կոնվենցիայի 13-րդ հոդվածի վրա, որն ունի հետեւյալ բովանդակությունը.

«Յուրաքանչյուր ոք, ում սույն Կոնվենցիայով ամրագրված իրավունքներն ու ազատությունները խախտվում են, ունի պետական մարմինների առջեւ իրավական պաշտպանության արդյունավետ միջոցի իրավունք, նույնիսկ եթե խախտումը կատարել են ի պաշտոնե գործող անձինք»:

138. Կառավարությունը պնդել է, որ 2012 թվականի փետրվարի 29-ին տեղի ունեցած դեպքի քննությունը եղել է բազմակողմանի եւ արդյունավետ, եւ դրա արդյունքում հայտնաբերվել եւ պատժվել են Տ. Վարյանի մահվան համար պատասխանատուները:

Ինչ վերաբերում է ոչ նյութական վնասի հատուցման պահանջի անհնարինության վերաբերյալ դիմումատուի բողոքին, ապա Կառավարությունը պնդել է, որ տվյալ ժամանակահատվածում օրենքը ոչ նյութական վնասի հատուցում չէր նախատեսում: Միաժամանակ դիմումատուն ներպետական վարույթի ընթացքում չի պահանջել որեւէ վնասի փոխհատուցում եւ (կամ) չի դիմել Սահմանադրական դատարան՝ տվյալ ժամանակահատվածում գործող քաղաքացիական իրավունքի համապատասխան դրույթների սահմանադրականությունը վիճարկելու համար: Հետեւաբար այս բողոքի մասով նա չի սպառել ներպետական իրավական պաշտպանության միջոցները:

139. Դիմումատուն պնդել է իր բողոքն առ այն, որ իր որդու մահվան հանգամանքների քննությունը չի եղել արդյունավետ, եւ որ ոչ նյութական վնասի համար պետությունից փոխհատուցում պահանջելու հնարավորություն չի եղել, քանի որ տվյալ ժամանակահատվածում գործող ներպետական օրենսդրությամբ չի նախատեսվել այդպիսի հնարավորություն:

140. Դատարանը գտնում է, որ Կառավարության՝ ներպետական իրավական պաշտպանության միջոցները չսպառելու վերաբերյալ առարկությունը (տե՛ս վերելում՝ 138-րդ պարբերությունը) սերտորեն կապված է դիմումատուի՝ Կոնվենցիայի 13-րդ հոդվածով ներկայացված բողոքի այն էական հիմքի հետ, որ ներպետական օրենսդրության համաձայն իր որդու կորստի հետեւանքով կրած ոչ նյութական վնասի համար պետությունից փոխհատուցում պահանջելու հնարավորություն չի եղել: Հետեւաբար այն գտնում է, որ Կառավարության առարկությունը պետք է միացվի դիմումատուի՝ նույն դրույթով ներկայացված բողոքի ըստ էության քննությանը:

141. Դատարանը նշում է, որ Կոնվենցիայի 13-րդ հոդվածով ներկայացված դիմումատուի բողոքները ո՛չ ակնհայտորեն անհիմն են, ո՛չ էլ անընդունելի Կոնվենցիայի 35-րդ հոդվածում նշված որեւէ այլ հիմքով: Հետեւաբար դրանք պետք է հայտարարվեն ընդունելի:

142. Դատարանը վերահաստատում է, որ 13-րդ հոդվածն անկախ գոյություն ունենալ չէր կարող. այն պարզապես լրացնում է Կոնվենցիայի եւ դրա արձանագրությունների նյութաիրավական մյուս դրույթները (տե՛ս Զավոլոկան ընդդեմ Լատվիայի [Zavoloka v. Latvia], թիվ 58447/00, § 35 (ա), 2009 թվականի հուլիսի 7): Այն կարող է միայն կիրառվել Կոնվենցիայի կամ արձանագրությունների մեկ կամ մեկից ավելի հոդվածների հետ համատեղ կամ դրանց լույսի ներքո, որոնց կապակցությամբ առկա է եղել ենթադրյալ խախտում: 13-րդ հոդվածը հիմք ընդունելու համար դիմումատուն պետք է ներկայացնի փաստարկերի պնդում Կոնվենցիայի մեկ այլ դրույթով եւս (տե՛ս, օրինակ, Ուոլթերն ընդդեմ Իտալիայի (որոշում) [Walter v. Italy (dec.)], թիվ 18059/06, 2006 թվականի հուլիսի 11):

143. Անդրադառնալով Կոնվենցիայի 2-րդ հոդվածի դատավարական հայեցակետի հետ կապված իր եզրահանգումներին (տե՛ս վերելում՝ 128-130-րդ պարբերությունները), Դատարանը համարում է, որ սույն գործով անհրաժեշտ չէ քննել, թե արդյոք տեղի է ունեցել նաեւ Կոնվենցիայի 13-րդ հոդվածի խախտում՝ դիմումատուի որդու մահվան գործով քննության ենթադրյալ անարդյունավետության մասով (տե՛ս, *mutatis mutandis*, վերելում հիշատակված՝ Մուրադյանի գործը, § 161 եւ Անահիտ Մկրտչյանի գործը, § 105):

144. Ինչ վերաբերում է դիմումատուի բողոքին, որ Հայաստանի օրենսդրությամբ չեն նախատեսվում իր որդու մահվան հետեւանքով կրած ոչ նյութական վնասի հատուցում պահանջելու միջոցներ (տե՛ս վերելում՝ 59-րդ պարբերությունում նշված՝ տվյալ ժամանակահատվածում գործող համապատասխան ներպետական կարգավորումները), Դատարանը նշում է, որ այն նախկինում գտել է, որ ցանկացած անձի երեխայի կյանքի կորստի հետեւանքով կրած ոչ նյութական վնասի հատուցման համար տվյալ ժամանակահատվածում դիմելու հնարավորություն տվող օրենսդրական դրույթների բացակայությամբ խախտվում է Կոնվենցիայի 13-րդ հոդվածի պահանջները (տե՛ս վերելում հիշատակված՝ Միրզոյանի գործը, §§ 79-83, եւ

վերելում հիշատակված՝ Հովհաննիսյանի եւ Կարապետյանի գործը, § 146): Դատարանը սույն գործով այլ եզրահանգում անելու որեւէ պատճառ չի տեսնում:

145. Ինչ վերաբերում է Կառավարության այն փաստարկին, որ դիմումատուն ներպետական վարույթի շրջանակներում չի պահանջել որեւէ վնասի փոխհատուցում (տե՛ս վերելում՝ 138-րդ պարբերությունը), Դատարանը նկատում է, որ դիմումատուն մասնավորապես բողոք է ներկայացրել այնպիսի ներպետական իրավական դրույթների բացակայության հետ կապված, որոնք հնարավորություն կտային նրան իր որդու կյանքի իրավունքի խախտման հետեանքով կրած կորստի համար պետությունից պահանջելու ոչ նյութական վնասի հատուցում (տե՛ս վերելում՝ 137-րդ եւ 139-րդ պարբերությունները): Հաշվի առնելով տվյալ ժամանակահատվածում ոչ նյութական վնասի հատուցում պահանջելու հնարավորություն տվող իրավական դրույթների բացակայությունը (տե՛ս վերելում՝ 144-րդ պարբերությունը), պարզ չէ, թե դիմումատուն ինչ արդյունք (առկայության դեպքում) կարող էր ունենալ, եթե նա, այնուհանդերձ, ներպետական վարույթի շրջանակներում դիմեր ոչ նյութական վնասի հատուցման համար:

Ինչ վերաբերում է այն պնդմանը, որ դիմումատուն կարող էր դիմել Սահմանադրական դատարան՝ տվյալ ժամանակահատվածում գործող քաղաքացիական իրավունքի համապատասխան դրույթների սահմանադրականությունը վիճարկելու համար (տե՛ս վերելում՝ 138-րդ պարբերությունը), ապա Դատարանը նախկինում վճռել է, որ իրավական պաշտպանության սահմանադրական միջոցը, որպես կանոն, չի համարվում ներպետական իրավական պաշտպանության միջոց, որը պետք է սպառվեր՝ հաշվի առնելով Հայաստանի սահմանադրական դատարանի դատական դերի առանձնահատկությունները (տե՛ս Վոլոդյա Ավետիսյանն ընդդեմ Հայաստանի [Volodya Avetisyan v. Armenia], թիվ 39087/15, § 33, 2022 թվականի մայիսի 3, եւ դրանում մեջբերված նախադեպային իրավունքը):

ՎԱՐՅԱՆՆ ԸՆԴԴԵՄ ՀԱՅԱՍՏԱՆԻ ԳՈՐԾՈՎ ՎՃԻՌ

146. Հաշվի առնելով վերոնշյալ նկատառումները՝ Դատարանը մերժում է Կառավարության առարկությունը՝ ներպետական իրավական պաշտպանության միջոցները չսպառելու մասով, եւ գտնում է, որ տեղի է ունեցել Կոնվենցիայի 13-րդ հոդվածի խախտում՝ դիմումատուի կողմից՝ իր որդու կյանքի իրավունքի խախտման հետեւանքով կրած ոչ նյութական վնասի համար հատուցում պահանջելու իրավական հնարավորության բացակայության մասով:

IV. ԿՈՆՎԵՆՑԻԱՅԻ 41-ՐԴ ՀՈԴՎԱԾԻ ԿԻՐԱՌՈՒՄԸ

147. Կոնվենցիայի 41-րդ հոդվածի համաձայն՝

«Եթե Դատարանը գտնում է, որ տեղի է ունեցել Կոնվենցիայի կամ դրան կից արձանագրությունների խախտում, իսկ համապատասխան Բարձր պայմանավորվող կողմի ներպետական իրավունքն ընձեռում է միայն մասնակի հատուցման հնարավորություն, ապա Դատարանը որոշում է անհրաժեշտության դեպքում տուժած կողմին արդարացի փոխհատուցում տրամադրել»:

Ա. Վնասը

148. Դիմումատուն պահանջել է 70 000 եվրո՝ որպես ոչ նյութական վնասի հատուցում:

149. Կառավարությունը դիմումատուի պահանջը համարել է անհիմն եւ չափազանցված:

150. Դատարանը, կատարելով իր գնահատումն արդարության սկզբունքի հիման վրա եւ հաշվի առնելով գործի կոնկրետ հանգամանքները, դիմումատուին շնորհում է 30 000 եվրո՝ որպես ոչ նյութական վնասի հատուցում:

Բ. Ծախսերը եւ ծախքերը

151. Դիմումատուին տրամադրվել է իրավաբանական օգնություն (տե՛ս վերելում՝ 2-րդ պարբերությունը), եւ լրացուցիչ ծախսերի կամ ծախքերի համար փոխհատուցում ստանալու փորձ չի արվել: Հետեւաբար Դատարանից չի պահանջվում այս մասով որեւէ որոշում կայացնել:

ԱՅՍ ՀԻՄՆԱՎՈՐՄԱՄԲ ԴԱՏԱՐԱՆԸ ՄԻԱԶԱՅՆ՝

1. Հայտարարում է գանգատն ընդունելի.
2. Միացնում է Կառավարության՝ դիմումատուի կողմից 13-րդ հոդվածով ներկայացված նրա բողոքի մասով ներպետական իրավական պաշտպանության միջոցները չսպառելու մասին առարկությունն ըստ էության քննությանը եւ մերժում է այն.
3. Վճռում է, որ տեղի է ունեցել Կոնվենցիայի 2-րդ հոդվածի խախտում՝ դրա նյութաիրավական հայեցակետի մասով.
4. Վճռում է, որ տեղի է ունեցել Կոնվենցիայի 2-րդ հոդվածի խախտում՝ դրա դատավարական հայեցակետի մասով.
5. Վճռում է, որ տեղի է ունեցել Կոնվենցիայի 13-րդ հոդվածի խախտում՝ դիմումատուի կողմից՝ իր որդու կյանքի իրավունքի խախտման հետեւանքով կրած ոչ նյութական վնասի համար հատուցում պահանջելու իրավական հնարավորության բացակայության մասով.
6. Վճռում է, որ չկա անհրաժեշտություն քննելու, թե արդյոք տեղի է ունեցել Կոնվենցիայի 3-րդ հոդվածի խախտում՝ դիմումատուի որդու մահվան նկատմամբ ցուցաբերված վատ վերաբերմունքի մասով.
7. Վճռում է, որ չկա անհրաժեշտություն քննելու, թե արդյոք տեղի է ունեցել Կոնվենցիայի 13-րդ հոդվածի խախտում՝ դիմումատուի որդու մահվան գործով քննության ենթադրյալ անարդյունավետության մասով.

8. Վճռում է, որ՝

ա) պատասխանող պետությունը վճիռը Կոնվենցիայի 44-րդ հոդվածի 2-րդ կետին համապատասխան վերջնական դառնալու օրվանից երեք ամսվա ընթացքում պետք է ոչ նյութական վնասի դիմաց դիմումատուին վճարի 30 000 եվրո (երեսուն հազար եվրո), որը պետք է փոխարկվի պատասխանող պետության արժույթով՝ վճարման օրվա դրությամբ գործող փոխարժեքով՝ գումարած գանձման ենթակա ցանկացած հարկ,

բ) վերը նշված եռամսյա ժամկետի ավարտից հետո մինչև վճարման օրը պետք է հաշվարկվի վերոնշյալ գումարի նկատմամբ պարզ տոկոսադրույք՝ չկատարման ժամանակահատվածում Եվրոպական կենտրոնական բանկի սահմանած՝ լոմբարդային ռեպոյի տոկոսադրույքի չափով՝ գումարած երեք տոկոսային կետ.

9. Մերժում է դիմումատուի՝ արդարացի փոխհատուցման պահանջի մնացած մասը:

Կատարված է անգլերենով եւ գրավոր ծանուցվել է 2024 թվականի հունիսի 4-ին՝ համաձայն Դատարանի կանոնակարգի 77-րդ կանոնի 2-րդ եւ 3-րդ կետերի:

Անդրեա Տամիետտի՝

Քարտուղար

Գաբրիել Կուչկո-Ստադլմայեր՝

Նախագահ